

Ikalaata ilya Paulo ku

## Bhaluumi

### Uwandilo

Umusundikwa uPaulo ásimbile ikalaata ili ku Bhakilisiti abhi nhaaya iya mu Luumi umwanha uwa 56 we uKilisiti apapiilwe, kunongwa ye akhanzaga kubhapanjila intumi zye alumbiliye mu nsi izinji. Akubhapanjila kuti intumi iNyinza iya Yeesu yikulolesya she uMulungu akubhabhaazizya uwugolosu abhantu abhi nsi zyonti ku lwitikho. Ku Bhayahuudi aBhakilisiti, akubhapanjila kuti intumi ini yili na mu Lufingo ulwa Khali. Ku bhe te Bhayahuudi akubhalanga kuti intumi yiniyo yikubhimvwanya nu Mulungu na kubha bhantu bhaakwe. Akupanga kuti ku lwitikho uMulungu atubhaziziizye uwugolosu pamiiso gaakwe. Pe shiniisho, uMulungu atakutubhaazizya uwugolosu kwi dala ilya kuzilandata indajizyo zyakwe. Lyoli inga tukumuleshela uMupepu uMufinjile kutulongola mu wiikhalo wiitu, pe tukwikhala anza she uMulungu akwanza.

Kuwumalilishilo mu shitaabu ishi (mu malyango aga 12-15), uPaulo akupanga injendo iya Bhakilisiti ye bhakwanziwa kubha nayo mu wiikhalo waabho. Akumanyizya izya kubhagana abhantu abhanji. Akumalilizya (mu malyango uwa 16) kubhalamukha abhamanyani bhaakwe abha ku Luumi, akumulamukha weeka weeka kwi taawa lyakwe.

Zye zili mu shitaabu ishi
Intumi iya musimbi na bhe akubhasimbila ikalaata ili
UMulungu akubhabhaazizya uwugolosu abhantu kwi dala lyeka lyen
Imanyizyo izya wuumi uwupwa uwa Bhakilisiti
UMulungu abhasabhuye abhayahuudi, akhayibhapokha
Injendo zya Bhakilisiti, ni mbombo ya Paulo
Indamukho ku bhe bhitishile abhamwabho abha shibhanza

### Indamukho

<sup>1</sup> Ine ne Paulo, ne ne mubhombi wa Yeesu Kilisiti. Imbilishiliilwe na kusaabhuulwa kubha ne musundikwa, inga indumbililaje intumi inyinza izya Mulungu.

<sup>2</sup> Intumi ziniizyo, zye uMulungu alajile kufuma imaandi, kwi dala ilya bhakuwi bhaakwe mu Wusimbe uWufinjile.

<sup>3</sup> Ziniizyo ntumi izya Mwana waakwe we ishimubhili apapiilwe mu shikholo sha mwene uDaudi.\* <sup>4</sup> Wunuyo we uMulungu amuzuyisiize, ku makha ga Mupepu waakwe uMufinjile. Kwi dala linyilo, amusimishiziize kuti Mwana wa Mulungu† uwa makha gonti. Wunuyo we wu Mwene witu uYeesu Kilisiti. <sup>5</sup> Kushilila kukwakwe, uMulungu andoleeye uwiila, kuti imbe ne musundikwa. Abhombile shiniisho inga imbalumbililaje abhantu bhonti bhe te Bhayahuudi, bhamwitishe uMwene uYeesu na kulandata ishigane shaakwe inga itaawa lyakwe lipalwaje. <sup>6</sup> Niimwe bhulo mali mu mpuga yiniyo iya bhantu bhe bhabhilishiliilwe kubha bhantu bha Yeesu Kilisiti.

<sup>7</sup> Pe shiniisho, inkubhasimbila imwe mwe mwitishile mwenti mwe mali mu nhaaya iya mu Luumi, mwe uMulungu abhaganile nhaani, abhabhilishiye inga

\* 1:3 1:3 UDaudi Bhaazya mu Wilulanyo uwa mazwi amajeni.

† 1:4 1:4 UMwana wa Mulungu Bhaazya mu Wilulanyo uwa mazwi amajeni.

mubhe mwe bhafinjile.† †Taata wiitu uMulungu nu Mwene uYeesu Kilisiti bhabhalolelaje uwiila na kubhapa uwutengaanu.

*UPa*ulo akusiibha kuyaatila inhaaya iya mu Luumi

<sup>8</sup> Kuwandilo, inkumusalifwa uMulungu kwi dala ilya Yeesu Kilisiti kunongwa yiinyu imwe mweni, kunongwa ye intumi izya lwitikho lwinyu zivwinshile mu nsi zyonti.

<sup>9</sup> UMulungu we inkumabhombela ku mwoyo waani wonti, kwi dala ilya kubhalumbiilila abhantu iNtumi iNyinza izya Mwana waakwe, amanyile she inkubhapuutitila imwe akhabhalilo khonti. <sup>10</sup> Akhabhalilo khonti inkumulaabha uMulungu kuti, inga ayigana, anigulile idala ilya kwinda kubhayaatila imwe. <sup>11</sup> Kunongwa ye insambile nhaani kubhalola, inga imbape ishikunjilwa isha shifinjile inga mugome amooyo. <sup>12</sup> Kwe kuti, ulwitikho lwinyu lungomwe ine, nu lwitikho lwani lubhagomwe imwe.

<sup>13</sup> Imwe bhanholo bhitu mu lwitikho, inkwanza mumanye kuti, akhinji bhulo nasibhililaga nhaani kwinda kubhalola imwe. Heelo, inkudindanjilwa kufishila akhabhalilo ikha. Inkwanza ininze indumbiilile iNtumi iNyinza ziniizyo kukwinyu, inga imbakwese abhantu bhamwitishe uMwene uYeesu, anza she nabhombile ku bhantu abhanji bhe te Bhayahuudi. <sup>14</sup> Yeenya, uMulungu andajiziize indumbililaje iNtumi iNyinza ku bhantu bhonti, ku Bhayunaani na ku bhe te Bhayunaani, ku bhabhaazyte na ku bhe te bhabhaazyte. <sup>15</sup> Ye nongwa insambile nhaani kwinda kulumbiilila iNtumi iNyinza kukwinyu imwe mubhantu abha ku Luumi.

*Amakha gi Ntumi iNyinza*

† 1:7 1:7 Abhafinjile Bhaazyte mu Wilulanyo uwa mazwi amajeni.

<sup>16</sup> Ine intakulola insoni poope nakhati kuzivwinya iNtumi iNyinza ziniizyo zye makha ga Mulungu aga kubhapokha abhantu bhonti bhe bhakumwitikha uYeesu, kwandila ku Bhayahuudi kufishila ku bhe te Bhayahuudi. <sup>17</sup> INtumi iNyinza ziniizyo zikulolesya apazelu she uMulungu akubhabhaazizya abhantu uwugolosu. Abhantu bhakubhaaziwa uwugolosu kwi dala ilya lwitikho lwene, anza she yisimbiilwe mu Wusimbe uWufinjile kuti, “Umuntu umugolosu atiposheelee uwu-umi ku lwitikho.”§

*Umulakha wa Mulungu ku bhantu abhi mbiibhi*

<sup>18</sup> uMulungu akulolesya apazelu umulakha waakwe kufuma kumwanya ku bhantu bhe bhakukhaana, khabhili bhe kwi dala ilyi mbiibhi zyaabho, bhakuwudindanjila uwanalyoli waakwe wutamanyikhaje. <sup>19</sup> Te kuti bhatamanyile khokhonti ku zya Mulungu, ndaali. Yeenya, gaala ge nhani gakumanyikha gali apazelu, kunongwa ye uMulungu wuuyo agagubuuye ku bhantu. <sup>20</sup> Kuwandilo uwi nsi zyonti, uMulungu apelile ivintu vronti. Pe kufuma akhabhalilo khanaakho na kwi dala ilya vintu viniivwo, abhantu bhangakhola kumanya she uMulungu ali, poope she bhatakumulola. Ivintu vwe apelile vikulolesya kuti uMulungu ali na makha aga wiila na wiila, khabhili uweene wa Mulungu wuuyo mwene, ataliipo uwamwabho. Ye nongwa abhantu bhangakhola kulonga kuti bhatamumanyile uMulungu. <sup>21</sup> Poope she bhamumanyile uMulungu she ali, bhatakumupaala awe kumusalifwa anza she akhondeeye. Lyoli abheene bhakubha ni nsibho imbiibhi, na mooyo gaabho gakubha wulema weene. <sup>22</sup> Abheene bhakuyibaada kuti

§ 1:17 1:17 Bhaazya Habakuuki 2:4.

bhali ni njele, fwani bhalema. <sup>23</sup> Bhaleshile kumupuuta **uMuluṅgu** we aliipo wiila, bhakupuuta ivifwani iwwa bhamuluṅgu vwe vikholiine na bhantu, vimo vikholiine ni vikhanu, ni nyonyi, ni vipelwa vwe vikudendelukha, poope she ivipelwa viniivwo vwonti vikufwa.

<sup>24</sup> Kunongwa yiniyo, **uMuluṅgu** abhaleshile bhalandataje insungukho zya bho imbiibhi, bhabhombelaje inongwa izyi nsoni mu mabhili gaabho. <sup>25</sup> Bhaleshile kwitika uwanalyoli uwa Muluṅgu, bhakulandata ilenga. Bhakuvibhombela ivipelwa na kuvipuuta sita kumupuuta **uMuluṅgu**, uMupeli we akhondeeye kupaalwa wiila! Zibhe shiniisho.

<sup>26</sup> Kunongwa yiniyo, **uMuluṅgu** abhaleshile bhalandataje insungukho zya bho izyi nsoni, she bhakwanza. Kwe kuti, abhantanda bhaleshile kubhombela amabhili gaabho ku bhasakhaala bhaabho she yikwanziwa. Lyoli bhandile kubhembukha bhiibho na bhiibho. <sup>27</sup> Shiniisho na bhasakhaala bhoope, bhaleshile kubhombela amabhili gaabho ku bhantanda bhaabho she yikwanziwa. Lyoli bhandile kusunguhana bhiibho na bhiibho. Bhakubhomba inongwa izyi nsoni. Kufumilana na liniilyo, bhayisebheeye bhiibho ulufundo lwe lukwiliine ni mbombo zya bho imbiibhi ziniizyo.

<sup>28</sup> Pe anza she abhantu bhanaabho bhakhaanile uwumanyi uwa nalyoli uwi nongwa zya Muluṅgu, **uMuluṅgu** wope abhaleshile bhalandataje insiibho zya bho imbiibhi. Bhakubhomba inongwa zye zitakhondeeye kubhombwa. <sup>29</sup> Bhizuuye uwubhiibhi nuwo nuwo, insungukho iya vintu vwonti ivibhiibhi, nu mwone. Bhali ni bho, uwugoji, uwulumanyi, ilenga, insiibho imbiibhi, na masenha. <sup>30</sup> Khabhili bhakwandilana amalenga, bhakumuviisya **uMuluṅgu**, bhataksaajila inongwa izya bhamwabho, bhantu bha

mabaado na kuyipaala, bhakwanza amadala amapwa aga kubhomba imbiibhi. Bhatakubhatinikha abhapaafi bhaabho, <sup>31</sup> bhantu bhe bhalema, bhatakubhomba kulandatana ni mfingo zyaabho, bhatali nu lugano ni shisa. <sup>32</sup> Abhantu bhanaabho bhamanyile akhinza indajizyo iya wugolosu wa Mulungu kuti, umuntu inga abhomba imbombo imbiibhi anza ziniizi, akhondeeye kufwa. Poope shiniisho, bhatakusaajila ziniizyo! Bhakujendeelela kubhomba imbiibhi sita kwogopa khokhonti, kabhili bhakwitinhana na bhantu bhe bhakubhomba imbombo imbiibhi anza ziniizyo.

## 2

**UMulungu** akhayibhalonga abhantu sita kwimila

<sup>1</sup> Pe iwe wamwitu, we ukubhalonga abhanji, utangakhola kulamba pilongolela pa Mulungu, poope ubhe we naanu. Kunongwa ye ziila zye ukubhalonga abhanji, ukuyilonga waneewe, kunongwa ye imbiibhi zye uweene akubhomba zye niwe ukuzibhomba.

<sup>2</sup> Tumanyile kuti uwulonji wa Mulungu wa nalyoli ku bhantu bhe bhakubhomba imbombo imbiibhi anza ziniizyo. <sup>3</sup> Ileelo, iwe wamwitu, we ukumulonga uwamwinyu kumo niwe ukubhomba imbiibhi ziniizyo, bhuli ukuti ukhayiselenga uwulonji wa Mulungu?

<sup>4</sup> UMulungu mwinza, kabhili akukulolela ishisa ishipiti, akukujimbiilila nhaani. Lyoli iwe ukulesya kuti ukushoolanya ziniizyo. Bhuli, utamanyile kuti uwinza we akuwubhomba kukwakho akukubhombela inga ulaate imbiibhi zyakho? <sup>5</sup> Ileelo kunongwa ye ali na maluli, kabhili ukukhaana kulaata imbiibhi zyakho, ukuyonjeleshezya ulufundo pi siku lye uMulungu akhayilolesya umulakha nu wulonji waakwe uwa wugolosu.

<sup>6</sup> Isiku liniilyo “uMULUNGU akhayimuposheeleya weeka weeka kulandatana ni mbombo zyakwe.”\*

<sup>7</sup> Bhaala bhe kwi dala ilya kuyikungula kubhomba inyinza, bhakwanza uwumwamu, ulushindikho, nu wiikhalo we wutali nu wamalilishilo, uMULUNGU akhayibhapa uwuumi uwa wiila. <sup>8</sup> Ileelo, abhalyovi na bhe bhatakwitikha uwanalyoli, khabhili bhakubhomba imbiibhi, uMULUNGU akhayibhaviitilwa na kubhapa ulufundo. <sup>9</sup> Abhantu bhonti bhe bhakubhomba imbombo imbiibhi, bhakhayeleela na kuyimba, kwandila ku Bhayahuudi kufishila ku bhe te Bhayahuudi. <sup>10</sup> Ileelo bhonti bhe bhakubhomba inyinza, uMULUNGU akhayibhapa uwumwamu, ulushindikho, nu wutengaanu, kwandila ku Bhayahuudi kufishila ku bhe te Bhayahuudi. <sup>11</sup> uMULUNGU atakumwimila umuntu wowonti.

<sup>12</sup> Abhantu bhe te Bhayahuudi bhe bhakubhomba imbiibhi bhakhayiyazwa, poope she bhatazimanyile indajizyo zya Moose.† Ileelo aBhayahuudi bhe bhazimanyile indajizyo ziniizyo, inga bhakubhomba imbiibhi, bhakhayilongwa kulandatana ni ndajizyo ziniizyo. <sup>13</sup> Bhakhayilongwa kunongwa ye uMULUNGU atakumubhaazya uwugolosu umuntu kufumilana na kwimvwa indajizyo zya Moose, lyoli akumubhaazya uwugolosu umuntu kunongwa ye akubhomba gaala ge indajizyo zikulonga. <sup>14</sup> Abhantu bhe te Bhayahuudi, bhatazimanyile indajizyo ziniizyo. Ileelo ku njendo zya bho inga bhakubhomba zye zikwanziwa mu ndajizyo zya Moose, ipo yikulolesya kuti mu mooyo

\* 2:6 2:6 Bhaazya Zabuuhi 62:12. † 2:12 2:12 indajizyo zya Moose Izi ndajizyo zye uMULUNGU abhapiye abhaisilaeli mu shilozu kushilila kwa Moose. Bhaazya uMoose mu Wilulanyo uwa mazwi amajeni.

gaabho bhamanyile kubhomba zye zikhondeeye. <sup>15</sup> Injendo zyaabho zikulolesya kuti zye zikwanziwa mu ndajizyo zisimbiilwe mu mooyo gaabho. Amooyo gaabho makeeti, insiibho zyaabho zyoze zikubhalonga, khabhili pamu zikubhalanga kuti bhakubhomba zye zikhondeeye. <sup>16</sup> She yikhayibha akhabhalilo khe uMulungu akhayibhalonga abhantu ku nsiibho zyaabho izya kukwilu, kwi dala ilya Yeesu Kilisiti. INTUMI INYINZA zye inkuzilumbiilila she zikulonga.

*ABhayahuudi ni ndajizyo zya Moose*

<sup>17</sup> Ishi, iwe we ukuyitekha kuti we Muyahuudi uwa nalyoli, ukusubhila kuti we mugolosu pamiiso ga Mulungu kwi dala ilya kulandata indajizyo zya Moose. Khabhili ukuyipaala kuti iwe we muntu wa Mulungu. <sup>18</sup> Ukuyibaada kuti uzimanyile ziila zye uMulungu azi-ganile na kusaabhuila ziila zye zikwanziwa, kunongwa ye umanyiiye indajizyo. <sup>19</sup> Ukuyilola kuti ukhondeeye kubha we mulongozi wa bhafwe amiiso, awe we lukhozyo lwe lukubhakhozezya abhantu mu khiisi. <sup>20</sup> Khabhili ukuyilola we mumanyizyi wa bhe bhatakuzyaganya, iwinza we mumanyizyi uwa bhaana abheela, kunongwa ye ukuyilola kuti indajizyo zikuukupa uwumanyi nu wanalyoli. <sup>21</sup> Iwe ukubhamanyizya abhanji, ileelo utakuzibhomba ziila zye ukulonga! Iwe ukulumbiilila abhanji kuti, “Utiibhaje,” ileelo khooni khe iwe waneewe ukwibha? <sup>22</sup> Iwe ukubhabhuzya abhantu kuti, “Utabhombaje uwubhembu,” ileelo khooni khe iwe waneewe ukubhembukha? Iwe we ukuviitilwa ivifwani iwawa bhamulungu, khooni khe ukwibha ivintu kufuma mu nyumba izya kupuutila ivifwani iwawa bhamulungu? <sup>23</sup> Iwe we ukuyipaala kuti uzimanyile indajizyo zya Mulungu, khooni khe ukumusupizya



uMulungu kwi dala ilya kuzishoolanya indajizyo zyakwe? <sup>24</sup> Anza she yisimbiilwe mu Wusimbe uWufinjile kuti, “Itaawa lya Mulungu likushoolanywa na bhantu bhe te Bhayahuudi kunongwa iyi mbombo imbiibhi zye imwe mukubhomba.” †

<sup>25</sup> Kutahiiliwa § kuli nu wukabhi inga ukulandata she indajizyo zikulonga. Ileelo inga ukushilanya indajizyo, kutahiiliwa kwakho kukubha kutali nu wukabhi wowonti, khabhili iwe utibhe ngati muntu we atatahiliwe. <sup>26</sup> Pe shiniisho, we atatahiliwe inga alandata she indajizyo zikulonga, uMulungu akhayimwitikha ngati atahiliwe. <sup>27</sup> Khabhili umuntu we atatahiliwe, ileelo akulandata indajizyo, injendo zyakwe inyinza zitilolesye kuti iwe Muyahuudi we mutula nongwa. Kunongwa ye utahiliwe, ni ndajizyo uli nazyo, ileelo utakuzilandata. <sup>28</sup> Yeenya, te kuti umuntu wowonti we apapiilwe Muyahuudi atibhe muntu wa Mulungu, khabhili umuntu atakubha muntu wa Mulungu kufumilana na kutahiiliwa. <sup>29</sup> Umuntu wa Mulungu wu wuula we mu mwoyo waakwe, ali nu lutinikho kwa Mulungu. Kwope kutahiiliwa ukwa nalyoli ku kuula kugombwa umwoyo kwe kukubhombekha nu Mupepu uMufinjile, te kwi dala ilya kulandata indajizyo. Umuntu anza wunuuwo, atakupaalwa na bhantu, lyoli atipaalwe nu Mulungu wuuwo.\*

### 3

#### *Uwusunde wa Mulungu*

† 2:24 2:24 Bhaazya Yeesaya 52:5; Ezekieli 36:20, 22. § 2:25 2:25 Kutahiiliwa Yaafile shilolesyo mu mubhili kulolesya ulufingo lwa Mulungu na bhantu bhaakwe. Bhaazya kutahiili mu Wilulanyo uwa mazwi amajeni. \* 2:29 2:29 Bhaazya Nkumbushizyo 30:6.

<sup>1</sup> Ishi kufumilana na ziniizyo, **kuli** nu wukabhi wooni **kubha** Muyahuudi? **Bhuli**, kutahiiliwa **kuli** na wukabhi wooni? <sup>2</sup> Nalyoli **kubha** Muyahuudi **kuli** nu wukabhi **ku** madala aminji. **Ku**wandilo, **uMulu**ngu ábhapiye aBhayahuudi izwi lyakwe inga bhalileme. <sup>3</sup> Ileelo, zingabha **bhuliibhuli** inga bhamu **mu** bhanaabho bhatáamile bhasunde **kulilema** izwi liniilyo? **Bhuli**, liniilyo lingeefwa uwusunde wa **Mulu**ngu? <sup>4</sup> Ndaali! **uMulu**ngu akubha she musunde wiila, she poope abhantu bhonti bhi lenga. Anza she yisimbilwe mu Wusimbe uWufinjile **kuti**,  
 “We **uku**longa amazwi gaakho ga wugolosu,  
 khabhili pa wulongi,  
 iwe **uku**tola.”\*

<sup>5</sup> Ileelo, inga uwubhiibhi **wiitu** wukusimishizya **kuti**, **uMulu**ngu akubhomba ku wugolosu we **akutu**longa, **tulonje tuti** bhuli? **Bhuli**, **tungalonga** **kuti** akubha sita wugolosu we **akutufunda**? **Inku**longa **ishimubhili**. <sup>6</sup> Ndaali! Inga zibhanje shiniisho, **uMulu**ngu angakhola **bhuliibhuli** **kubhalonga** abhantu abha **mu** nsi? <sup>7</sup> Umuntu angabhuziilizya **kuti**, “Inga ilenga lyani likwavwa **kulolesya** uwanalyoli wa **Mulu**ngu na kwonjezya uwumwamu waakwe, khooni khe ine **inku**longwa **kuti** ne **mubhomba** mbiibhi?” <sup>8</sup> Shiniisho yikholiine na **kuti**, “**Tubhombaje** imbiibhi inga inyinza zyinze?” Abhantu abhanji bhakutwandila amalenga **kuti** niitwe **tukumanyizya** shiniisho. Abhantu bhanaabho bhakhayifundwa **kulandata**na ni mbiibhi zyahho.

*Ataliipo* umuntu umugolosu

<sup>9</sup> Ishi **tulonje** lyoni? **Bhuli**, itwe tuBhayahuudi **tukhondeeye** nhaani **kushila** abhanji? Ndaali! Yeenya, anza she imbalanjile imwe, aBhayahuudi na bhe

\* 3:4 3:4 Bhaazya Zabuuli 51:4.

te Bhayahuudi, bhonti imbiibhi ziku**ubhatabhaala**.  
 10 Ziniizyo zili anza she yisimbiilwe mu Wusimbe  
 uWufinjile **kuti**,

“Ataliipo umuntu we mugolosu,  
 ataliipo ngaweeka.

11 Ataliipo umuntu we azimanyile izya **Mulungu**,  
 khabhili ataliipo ngaweeka we akumwanza  
**uMulungu**.

12 Abhantu bhonti bhaleshile kumutinikha **uMulungu**,  
 bhonti bhatakhondeeye winza pamiiso gaakwe.  
 Ataliipo umuntu we akubhomba inyinza,  
 ataliipo ngaweeka.”†

13 “Amalomu gaabho gali ngati mbiipa inyaazi,  
 imili zyaabho zikukhopela.”‡

“Mu malomu gaabho,  
 mukufuma amazwi agi nsalile anzi yi njokha.”§

14 “Amalomu gaabho,  
 gizuuye amazwi aga shigune na kuvwalazya.”\*

15 “Ivina nama vwabho vikhagalanu kushimbilila kugoga.

16 Poponti pe bhakubhala,  
 bhakunanganya na kuyimvwa abhanji.

17 Bhatalimanyile idala ilya kwikhala mu wutengaanu.”†

18 “Bhatakumutinikha **uMulungu** naalumo.”‡

19 Ishi tumanyile **kuti** zyonti zye indajizyo zikulonga,  
 zikubhabhuuzya bhaala bhe bhakutabhaalwa ni  
 ndajizyo ziniizyo. Zili shiniisho inga umuntu wowonti  
 atakhabhe ni lya kulamba, na bhantu bhonti bhali  
 ni nongwa pamiiso ga **Mulungu**. 20 Kunongwa ye

† 3:12 3:10-12 Bhaazya Zabuuili 14:1-3; 53:1-3. ‡ 3:13 3:13 Bhaazya  
 Zabuuili 5:9. § 3:13 3:13 Bhaazya Zabuuili 140:3. \* 3:14 3:14 Bhaazya  
 Zabuuili 10:7. † 3:17 3:15-17 Bhaazya Yeesaya 59:7-8. ‡ 3:18 3:18  
 Bhaazya Zabuuili 36:1.

ataliipo umuntu wowonti we akubhaaziwa kubha mugolosu pamiiso ga Mulungu kwi dala ilya kulandata indajizyo. Imbombo yi ndajizyo zikulolesya kuti bhonti bhabhombile imbiibhi.

*Umuntu akubhaaziwa uwugolosu kwi dala ilya lwitikho*

<sup>21</sup> Ileelo ishi, uMulungu alolesiizye idala lyakwe ilya kubhilitikha abhantu kuti bhagolosu, sita kusubhila indajizyo. Zyope indajizyo zya Moose nu wusimbe uwa bhakuwi vikusimishizya linyilyo. <sup>22</sup> Idala linyilyo kwe kumwitikha uYeesu Kilisiti. uMulungu akubhabhaazya abhantu bhonti kuti bhagolosu we bhamwitikha uYeesu Kilisiti. Atakwimila bha ndwimo, <sup>23</sup> kunongwa ye abhantu bhonti bhabhombile imbiibhi, na kubhulilwa nu wumwamu wa Mulungu. <sup>24</sup> Ileelo, ku wiila wa Mulungu, abhantu bhakubhaaziwa kuti bhagolosu pabhuulo, kwi dala ilya Yeesu Kilisiti we atutuulile. <sup>25</sup> uMulungu amufumwizye uYeesu abhe mfinjile iya kubhimvanya abhantu nu Mulungu, kwi dala ilya kwitikha kuti uYeesu afuuye kunongwa yaabho. Abhombile shiniisho inga alolesye uwugolosu waakwe. uMulungu atabhafundile abhantu ku mbiibhi zyabho zye bhabhombile ku khabhalilo akha palusalo. <sup>26</sup> Abhombile shiniisho inga alolesye uwugolosu waakwe akhabhalilo ikha, kunongwa ye uweene mugolosu, kabhili akubhabhaazya abhantu bhonti bhe bhakumwitikha uYeesu kuti bhagolosu.

<sup>27</sup> Bhuli, ishi umuntu angayibaada? Ndaali! Angayibaada ku lyoni? Angayibaada kunongwa ye akuzilandata indajizyo zya Moose? Ndaali. Lyoli angayibaada kunongwa iya lwitikho lwene. <sup>28</sup> Kunongwa ye tumanyile kuti uMulungu akumubhaazya umuntu kuti mugolosu kwi dala ilya lwitikho, te kwi dala ilya kulandata she indajizyo zya Moose zikulajizya.

<sup>29</sup> Bhuli, uMulungu wa Bhayahuudi bheene? Bhuli, te wu Mulungu uwa bhe te Bhayahuudi bhoope? Nalyoli uweene wu Mulungu wa bhantu bhe te Bhayahuudi, <sup>30</sup> kunongwa ye kuli uMulungu weeka mwene. Kwi dala ilya lwitikho, uweene akubhabhaazya abhantu bhonti kuti bhagolosu pamiiso gaakwe, bhabhe Bhayahuudi awe bhe te Bhayahuudi, bhonti bhakwitishilwa pamiiso gaakwe. <sup>31</sup> Bhuli, we tukusundiilila ulwitikho, kwe kuti tukuzishoolanya indajizyo? Ndaali! Lyoli inga twabha nu lwitikho, pe tutikwilizye zye indajizyo zilajiziize.

## 4

Kubhaaziwa uwugolosu kwi dala ilya lwitikho

<sup>1</sup> Pe shiniisho, tulonge tuti bhuli ku zya yise witu uAbulahaamu?\* Uweene azimanyile bhuliibhuli ziniizi izya kwitishilwa uwugolosu? <sup>2</sup> Inga uAbulahaamu abhaziiwe uwugolosu pamiiso ga Mulungu ku mbombo zyakwe inyinza, amile ni lya kuyibaadila. ileelo atakhondeeye kuyibaada pamiiso ga Mulungu, <sup>3</sup> kunongwa ye uWusimbe uWufinjile wakuti, “UAbulahaamu amwitishile uMulungu, wope uMulungu akhamubhaazya kuti mugolosu.”†

<sup>4</sup> Umuntu we akubhomba imbombo, vwe akuposheela te vwa pabhuulo, lyoli akuposheela vwe akhondeeye ku mbombo yaakwe. <sup>5</sup> ileelo umuntu we atakusubhila imbombo zyakwe, lyoli akumwitikha uMulungu we akubhabhaazya abhabhomba mbiibhi kuti bhagolosu, kwi dala ilya kwitikha kwabho. <sup>6</sup> Umwene uDaudi wope alonjile ku zyi nsayo zya muntu we uMulungu

\* 4:1 4:1 UAbulahaamu Bhaazya mu Wilulanyo uwa mazwi amajeni.

† 4:3 4:3 Bhaazya Wandilo 15:6.

akumubhaazya kuti mugolosu, sita kwenya imbombo zyakwe, átili,

<sup>7</sup> “Bhasayiilwe bhaala bhe uMwene abhatuyiye imbiibhi zyaabho, na kuweefwa uwubhiibhi waabho wonti.

<sup>8</sup> Asayiilwe umuntu we uMwene atakumubhaazya kuti ali ni mbiibhi.”<sup>‡</sup>

<sup>9</sup> Bhuli, insayo yiniyo ya bhaala bheene bhe Bhayahuudi, awe ya peeka na bhaala bhe te Bhayahuudi? Mukumbushe she uWusimbe uWufinjile wakuti, “UAbulahaamu ámwitishile uMwene, wope uMwene akhamubhaazya kuti mugolosu.”<sup>§</sup> <sup>10</sup> UAbulahaamu ábhaziiwe kuti mugolosu khabhalilo khalikwi? Akhabhalilo khe atáhiliwe awe we áshili kutahiiliwa? Ábhaziiwe we áshili kutahiiliwa. <sup>11</sup> Pilongolela, uAbulahaamu akhatahiiliwa. Kutahiiliwa kunukwo shikhabha shilolesyo isha kuti uMwene ámubhaziize kuti mugolosu kufumilana nu lwitikho lwene lwe áamile nalwo we áshili kutahiiliwa. Kwi dala liniyo uAbulahaamu akhabha wu yise wa bhonti bhe bhakwitikha, poope she bhatahiliwe, inga bhoope bhahaziize uwugolosu. <sup>12</sup> Khabhili uweene wu yise wa bhaala bhe bhatahiliwe, ileelo te kunongwa ye bhatahiliwe, lyoli kunongwa ye bhakulandata idala liliila ilya lwitikho ulwa yise witu uAbulahaamu lwe áyitishile we áshili kutahiiliwa.

<sup>13</sup> uMwene ámulajile uAbulahaamu na bhantu abha shipaafi shaakwe kuti, akhayibhapa insi zyonti zibhe wugaali waabho.\* uMwene atábhishile umulaji wunuwu kwa Abulahaamu kunongwa ye átinishile indajizyo, lyoli kunongwa ye áyitishile. Pe uMwene

<sup>‡</sup> 4:8 4:7-8 Bhaazya Zabuuhi 32:1-2. § 4:9 4:9 Bhaazya Wandilo 15:6.

\* 4:13 4:13 Bhaazya Wandilo 22:17-18.

akhamubhaazya uAbulahaamu kuti mugolosu. <sup>14</sup> Pe shiniisho, inga bhe bhakutinikha indajizyo bhe bhagaali, ulwitikho lutali nu wukabhi. Khabhili umulaji wa Mulungu wutakhondeeye ngakheeka, <sup>15</sup> kunongwa ye umuntu we akushilanya indajizyo akupeelwa ulufundo. Ileelo inga yitaliipo indajizyo, pe kutaliipo kushilanya indajizyo.

<sup>16</sup> Pe shiniisho umulaji wukuposheelwa kwi dala ilya lwitikho, inga wubhe ku wiila, khabhili wuposheelwe ku shipaafi sha Abulahaamu, te ku bhaala bhe bhakulandata indajizyo bheene, lyoli na ku bhaala bhe bhakumwitikha umulungu anzu Abulahaamu. Uweene we wu yise wiitu itwe twenti. <sup>17</sup> Inongwa ziniizi umulungu alonjile mu Wusimbe uWufinjile kuti, “Inkubhiishile ubhe we yise wa bhantu abhi nsi inyinji.”† Pe we uAbulahaamu ali pamiiso ga Mulungu, akhimvwa inongwa ziniizi zye umulungu amulajile. Akhamwitikha umulungu we akubhapa bhe bhafuuye uwuumi uwa wiila na wiila, na we akuvitekha ivintu vve vitaliipo naalumo ngati vilipo.

<sup>18</sup> We umulungu amubhuuzya uAbulahaamu amazwi ganaago, yamile pagomu kugitikha. Ileelo peeka na liniilyo, akhajendelela kwitikha na kusubhila kuti umulungu atibhombe anza she alonjile. Pe akhabha wu yise wa bhantu abhi nsi inyinji, anza she umulungu amubhuziize kuti, “Abhantu abha shipaafi shaakho bhakhayibha bhinji anzi nzota.”‡ <sup>19</sup> UAbulahaamu we akuposheela intumi ziniizyo pamu amile na manha imia yeeka (100). Amanyile kuti umubhili waakwe wamile ngati wufuuye, khabhili wope umushi waakwe uSaala amile muluji. Ileelo peeka na liniilyo ulwitikho

† 4:17 4:17 Bhaazya Wandilo 17:5. ‡ 4:18 4:18 Bhaazya Wandilo 15:5.

Iwakwe lutáamile itende. <sup>20</sup> Khabhili atáamile nu mwoyo uwa kusingaana ku zya mulaji we ápewiilwe nu Mulungu. Lyoli akhajina kumwitikha, akhaamupa uwumwamu, <sup>21</sup> kunongwa ye ámanyile kuti nalyoli uMulungu angakhola kubhomba ziila zye áljile. <sup>22</sup> Kunongwa yiniyo, uWusimbe uWufinjile wakuti, uMulungu akhamubhaazya kuti mugolosu. §

<sup>23</sup> Ileelo amazwi ganaaga ge gakuti, “uMulungu á-mubhaziize kuti mugolosu,” gatásimbiilwe ku zya Abulahaamu wuuyo mwene, <sup>24</sup> lyoli gásimbiilwe kunongwa yitu nitwe bhulo, twe uMulungu akhayitubhaazya kuti twe bhagolosu, inga twamwitikha uweene we á-muzyusiize uMwene wiitu uYeesu, kufuma ku bhafwe. <sup>25</sup> uMulungu ámufulwizye uYeesu kuti afwe kunongwa iyi mbiibhi zitu, khabhili akhamuziyusa inga itwe tubhaaziwe uwugolosu.

## 5

*Insayo* izya kwimvwananywa nu Mulungu

<sup>1</sup> Pe shiniisho, kunongwa ye uMulungu atubhaziize kuti twe bhagolosu kufumilana na kumwitikha uweene, tuli nu wutengaanu nawo kwi dala ilya Mwene wiitu uYeesu Kilisiti. <sup>2</sup> Kwi dala ilya kumwitikha uYeesu, uMulungu átupiiye uwiila, khabhili poope niishi akujendelela kuutupa uwiila. Kunongwa yiniyo, tukuseshela nhaani kunongwa ye tukusubhila kuti, tukhayibha peeka nu Mulungu mu wumwamu waakwe. <sup>3</sup> Te shiniisho sheene, lyoli tuseshelaje mu mayimba ge gakuwaga, kunongwa ye tumanyile kuti amayimba gakuuleetela uwujimbiilizu. <sup>4</sup> Uwujimbiilizu wakuleetela uwudandamazu, wope uwudandamazu

§ 4:22 4:22 Bhaazya Wandilo 15:6.



wakutuleetela ulusubhilo. <sup>5</sup> Ulusubhilo lunulwo lutangakhola kutusupizya, kunongwa ye uMulungu agizuziizye amooyo giitu ulugano lwakwe kwi dala ilya kuutupa uMupepu uMufinjile.

<sup>6</sup> Yeenya, we twámile twe bhatolwe, akhabhalilo khe uMulungu ábhatishile we khaafikha, uKilisiti á-fuuye kunongwa iya tubhabhomba mbiibhi. <sup>7</sup> Nalyoli pagomu nhaani umuntu kufwa kunongwa iya muntu umugolosu, ileelo pamu umuntu angalinga kuyifumwa kufwa kunongwa iya muntu umugolosu nhaani. <sup>8</sup> Ileelo uMulungu atulanjile kuti atuganile, kunongwa ye akhabhalilo khe tukhabhombaga imbiibhi uKilisiti áfu-uye kunongwa yiitu.

<sup>9</sup> Ishi kunongwa ye uMulungu atubhaziizye kuti twe bhagolosu kwi bhanda lya Yeesu, nalyoli uYeesu akhayitupokha nu mulakha wa Mulungu. <sup>10</sup> Kwe kuti uMulungu atwimvanyiiye itwe nawo kwi dala ilya wufwe wa Mwana waakwe paala we twámile twe bhalugu bhaakwe, pe itwe twe bhamanyani bhaakwe. Nalyoli uMulungu akhayitupokha mu mulakha waakwe kunongwa ye uMwene uYeesu mwumi wiila. <sup>11</sup> Khabhili te kuti li liniilyo lyene, lyoli peeka na liniilyo uMulungu atubhiishile tubhe nu luseshelo nhaani kunongwa ye uMwene wiitu uYeesu Kilisiti atwimvanyiiye nawo.

*UAdamu á*uteeeye uwufwe uYeesu átupiiye uwuumi

<sup>12</sup> Imbiibhi zynjiiye mu nsi kwi dala ilya muntu weeka, zikhatuleetela uwufwe. Kufumilana ni mbi-ibhi ziniizyo uwufwe wukhabhinzila abhantu bhonti, kunongwa ye bhonti bhabhombile mbiibhi. <sup>13-14</sup> Kufuma uAdamu abhombe imbiibhi pamiiso ga Mulungu ku-fishila pe uMoose ápewiilwe indajizyo, imbiibhi zyáliipo mu nsi. Abhantu bhonti abha khabhalilo khanaakho bhakhafwanga, poope she uMulungu atábhalonjile kuti

bhashilanyi bhi ndajizyo, kunongwa ye kutáamile ni ndajizyo. Uwufwe uwa wiila wátabhalaaye poope she abhantu bhatábhombile imbiibhi iya kushilanya indajizyo yoyonti iya Mulungu anzu Adamu.

UAdamu áamile shikholanyo sha Yeesu we áyinzile pilongolela. <sup>15</sup> Ileelo, imbiibhi ye uAdamu ábhombile, yikulegana nu wiila wa Mulungu. She poope imbiibhi iya muntu weeka, yáziizye uwufwe ku bhantu abhinji. Ileelo kuli nu muntu weeka uwamwabho, kwe kuti uYeesu Kilisiti, wunuuwo akubhapa abhantu abhinji uwiila uwa kutuuyilwa imbiibhi zyaabo. Uwiila wunuuwo uwa Mulungu wutali ni shipimilo, wakushila nhaani imbiibhi ya Adamu. <sup>16</sup> Khabhili she uMulungu akubhatuuyila abhantu ku wiila waakwe, yikulegana na gaala ge gakufumilana ni mbiibhi ya Adamu. We yabhombwa imbiibhi yeeka nu Adamu, uMulungu ábhalonjile abhantu na kubhapa ulufundo. Ileelo we zyaabhombekha imbiibhi inyinji na bhantu, uMulungu akhabhatuuyila ku shisa shaakwe, na kubhabhaazya kuti bhagolusu. <sup>17</sup> Imbiibhi iya muntu weeka uAdamu yáleetile uwufwe watabhaale abhantu bhonti. Ileelo nalyoli bhaala bhe bhakuposheela uwiila we wutali ni shipimilo kufuma kwa Mulungu na kubhaaziwa uwugolusu, bhakhayitola mu wiikhalo waabho, kunongwa ye bhakhayibha nu wuumi kwi dala iya gaala ge gábhombilwe nu muntu weeka uwunji, kwe kuti uYeesu Kilisiti.

<sup>18</sup> Pe shiniisho, anza she imbiibhi iya muntu weeka ye yáleetile ulufundo ku bhantu bhonti, she shiniisho abhantu bhonti bhakubhaaziwa uwugolusu na kuposheela uwuumi ku mbombo iya wugolusu iya muntu weeka. <sup>19</sup> Anza she umuntu weeka ákhaanile kumutinikha uMulungu, akhabhaazya abhantu abhinji bhabhe bhi mbiibhi, shiniisho umuntu weeka we ámutinishile

uMulungu, akhabhabhiikha abhantu abhinji bhabhe bhagolosu.

<sup>20</sup> Indajizyo zya Moose we zyzinza zikhonjezya imbiibhi. Ileelo imbiibhi we zyonjela, wope uwiila wa Mulungu ukhonjela nhaani. <sup>21</sup> Pe shiniisho, imbiibhi yamile na makha aga kutabhaala abhantu na kubhaleetela uwufwe. Ileelo she shiniisho uwiila wa Mulungu wuli na makha aga kutabhaala abhantu kwi dala ilya kubhabhaazya kuti bhagolosu, na kubhapa uwuume uwa wiila kwi dala ilya Yeesu Kilisiti uMwene wiitu.

## 6

### *UYeesu we ágatolile amakha agi mbiibhi*

<sup>1</sup> Ishi tulonge tuti bhuli? Bhuli, tujendeelele kubhomba imbiibhi inga uMulungu ajendeelele kutwonjezya uwiila? <sup>2</sup> Ndaali! Ku zyi mbiibhi, itwe tuli ngati twe bhafwe. Pe shiniisho, tutangajendeelela kwikhala winza mu mbiibhi. <sup>3-4</sup> Mumanye kuti, we twozelwa tukhasopenhana nu Yeesu Kilisiti, kwi dala liniilyo tukhasopenhana nawo mu wufwe waakwe. Pilongolela, uKilisiti akhazyukha ku wumwamu wa Mulungu, na kulandatana na liniilyo, niitwe buulo tubhe ni njendo impwa mu wiikhalo wiitu.

<sup>5</sup> Ishi, kunongwa ye tusopenhiine nawo mu wufwe waakwe, she shiniisho tukhayisopenhana nawo we uMulungu atuzusya anza she amuzusiize uweene. <sup>6</sup> Kunongwa ye tumanyile kuti uwuntu wiitu uwi maandi wakhomeliilwe peeka nu Kilisiti pa shikhobhenhanyo, inga imbiibhi zitatabhaalaje winza. Tutabhanje twe bhatumwa bhi mbiibhi winza. <sup>7</sup> Kunongwa ye umuntu inga aafwa shiniisho, atakutabhaalwa winza ni mbiibhi. <sup>8</sup> Ishi, kunongwa ye twafuuye peeka nu Kilisiti, tukwitikha kuti

tukhayikhala peeka nawo. <sup>9</sup> Kunongwa ye tumanyile kuti uKilisiti ázyushile, te akhaafwe winza. Uwufwe watali na makha kukwakwe winza. <sup>10</sup> We aafwa, áfuuye kheeka kheene,\* akhazitola imbiibhi zyonti. Akhabhalilo ikha mwumi, akwikhala akumukhondezya uMulungu. <sup>11</sup> Shiniisho niimwe muyilolaje kuti mwáfuuye peeka nawo, imbiibhi yitangakhola kubhatabhaala imwe winza. Khabhili muyilole kuti ishi mwe bhuumi, na mukwikhala kumukhondezya uMulungu kwi dala ilya kupatinhanywa nu Yeesu Kilisiti.

<sup>12</sup> Pe mutakhayitishizye imbiibhi kugatabhaala amabhili giinyu ge gakhayifwa. Inga mwayitishizya imbiibhi, yitibhakwese mulandate insungukho imbiibhi izya mabhili giinyu. <sup>13</sup> Khabhili mutazibhiikhaje impaaswa izya mabhili giinyu zibhe zya kubhombela imbiibhi. Lyoli muyifumwe kwa Mulungu, kunongwa ye muli anza bhantu bhe uMulungu abhazyusiizye, na kwinjila mu wuumi uwupwa. Khabhili zifumwaje impaaswa izya mabhili giinyu kwa Mulungu zibhombaje imbombo izya wugolosu. <sup>14</sup> Yeenya, imbiibhi te yibhatabhaale winza, kunongwa ye ishi mutakulongolwa na makha gi ndajizyo, lyoli mukulongolwa nu wiila wa Mulungu.

### *Abhatumwa abha wugolosu*

<sup>15</sup> Ishi, tulonge tuti bhuli? Bhuli, twonjezyaje kubhomba imbiibhi kunongwa ye tutakutabhaalwa ni ndajizyo, lyoli tukutabhaalwa nu wiila wa Mulungu?

---

\* 6:10 6:10 We aafwa, áfuuye kheeka kheene ABhayahuudi bháamile ni mwata iya kufumwa imfinjile iya kukhomaanywa nu Mulungu kheeka ku mwanha. Bhakhagalushilaga kubhomba shiniisho umwanha nuuwo nuuwo. Ileelo uYeesu uMulungu amufumwizye kubha mfinjile kheeka kheene.

Ndaali! <sup>16</sup> Nalyoli mumanyile akhinza **kuti** inga mwayifumwa **muneemwe** kwa muntu wowonti **kubha** mwe bhatumwa na kumutinikha umuntu **wunuu**yo, **mutibhe** mwe bhatumwa bhaakwe.† Kwe **kuti** inga mukuyifumwa **kubhomba** imbiibhi **mutibhe** mwe bhatumwa bhi mbiibhi, pe lye likufumila wufwe. Ileelo inga mukuyifumwa kumutinikha **uMulungu** **mutibhe** mwe bhatumwa bha **Mulungu**, pe lye likufumila **ku** **kubhaaziwa** uwugolosu. <sup>17</sup> Imaandi mwámile mwe bhatumwa bhi mbiibhi. Ileelo inkumusalifwa **uMulungu** **kunongwa** ye ishi mukutinikha **ku** mwoyo wiinyu wonti imanyizyo zye **muposheleeye**. <sup>18</sup> **uMulungu** abhabhiishile imwe **mu** **wasatulwe** kwepa mu wutumwa uwi mbiibhi, abhabhiishile **mutibhe** mwe bhatumwa bha wugolosu. <sup>19</sup> Nalonga **mu** shikholanyo shiniisho isha wutumwa inga **mukhole** kumanya khe **inkulonga**, **kunongwa** ye imwe **mutakuziyaganya** nalubhilo. We mutámumanyile uYeesu, mukhazifumwaga impaaswa izya mabhili giinyu **zibhe** ntumwa **zyi** mbombo **iza** wukhandamanu na **kubhomba** uwubhiibhi. Ileelo ishi, muzifumwaje impaaswa izya mabhili giinyu kwa **Mulungu**, **zibhe** ntumwa **zyi** mbombo **iza** wugolosu inga mwikhalaje mu wufinjile.

<sup>20</sup> We mwámile mwe bhatumwa bhi mbiibhi, **mutakhatabhalwaga** nu wugolosu. <sup>21</sup> **Bhuli**, akhabhalilo khanaakho we **mukubhomba** imbombo ziniizyo zye ishi **mukulola** insoni, **mukhawagaga** wukabhi **bhuli**? Zye zitifumilane na ziniizyo wufwe! <sup>22</sup> Ileelo ishi, mubhishiilwe **mu** **wasatulwe**, te mwe bhatumwa winza bhi mbiibhi, mwe bhatumwa bha **Mulungu**. Ishi

---

† 6:16 6:16 **Mutibhe** mwe bhatumwa bhaakwe Mwa Yookhani 8:34 uYeesu átili, “Umuntu wowonti we akujendelela **kubhomba** imbiibhi, akubha mutumwa wi mbiibhi.”

uwukabhi waakwe wufinjile. Zye zitifumilane na ziniizyo wuumi uwa wiila! <sup>23</sup> Kunongwa ye umuntu wowonti we mutumwa wi mbiibhi, akuposheela uwufwe. Ileelo uMulumu akuutupa uwuumi uwa wiila, kwi dala ilya kupatinhanywa nu Mwene wiitu uYeesu Kilisiti.

## 7

*Te twe bhatumwa bhi mbiibhi winza*

<sup>1</sup> Bhanholo bhiitu mu lwitikho, inkulonga niimwe mubhantu mwe muzimanyile indajizyo. Mumanyile kuti umuntu akwanziwa kuzilema indajizyo we ali she mwumi bhulo. <sup>2</sup> Ishi inilulanye liniili ku shikholanyo. Umwantanda we ayejiilwe atakwitishilwa ni ndajizyo kumulekha umulume waakwe we mwumi. Ileelo umulume inga aafwa, pe akubha musatulwe ku ndajizyo ziniizyo. <sup>3</sup> Pe shiniisho, inga ayejelwa nu mulume uwunji we umulume waakwe mwumi, we akubhembukha. Ileelo umulume waakwe inga aafwa, umwantanda wanuuyo atakutabhaalwa winza ni ndajizyo yiniizyo. Inga ayejelwa nu musakhaala uwamwabho, we atakubhembukha.

<sup>4</sup> Bhanholo bhiitu mu lwitikho, shiniisho she zili kukwinyu niimwe. Anza she umuntu inga aafwa atakutabhaalwa winza ni ndajizyo, niimwe mutakutabhaalwa winza ni ndajizyo, kunongwa ye mali ngati mufuuye peeka nu Kilisiti pa shikhobhenhanyo. Ishi mwabha mwe bhantu bhaakwe. Wope azyushile inga itwe tumwelelaje uMulumu amatunda. <sup>5</sup> We tukhatabhalwaga nu wuntu wiitu uwi maandi, indajizyo zikhabhiikha insungukho zyitu imbiibhi zibhe na makha nhaani mumwitu, tukhasungukhaga kubhomba imbiibhi akhabhalilo khonti. Kufumilana na liniizyo, tweleeye amatunda amabhiibhi ge gakuleta

uwufwe. <sup>6</sup> Heelo ishi twasatulwa kufuma mu wukungwe uwi ndajizyo, ye nongwa tufuuye ku ndajizyo zye zyatabhalaaye. Ishi tukumubhombela uMulungu kwi dala ipwa ilya kulongolwa nu Mupepu uMufinjile, te kwi dala ilyi maandi ilya kulongolwa ni ndajizyo zye zisimbiilwe.

*Indajizyo zye zikulanga imbiibhi*

<sup>7</sup> Ishi tulongje tuti bhuli? Tuti indajizyo mbiibhi? Ndaali! Heelo inga indajizyo zitabhanje, ine nhani intamanyile kuti imbiibhi khantu khooni. Inga yitabhanje indajizyo ye yikuti, “Utasungukhaje akhantu kha wamwinyu,”\* ine nhani intamanyile kuti kusungukha akhantu kha wamwitu khabhiibhi. <sup>8</sup> Heelo we naamanya indajizyo ini, pe imbiibhi zikhadaamusa insungukho imbiibhi izya vikholo niivwo niivwo mukaasi yaani. Kunongwa ye inga indajizyo zitabha, imbiibhi zitakubha na makha. <sup>9</sup> Insiku izya kulusalu we intazimanyile indajizyo zya Mulungu, inhambombaga she inhanzaga. Heelo we naamanya indajizyo, imbiibhi zikhabha na makha kukwani, <sup>10</sup> ine inhabha ngati imfuuye. Inhalola kuti indajizyo ziniizyo zye zikhanziwaaga kuleeta uwuumi, ileelo zikhaleeta uwufwe. <sup>11</sup> Kunongwa ye imbiibhi we yinjila mu ndajizyo yiniyo, yikhanhopela, pe shiniisho zikhaleeta uwufwe. <sup>12</sup> Poope shiniisho, indajizyo mfinjile ni ndajilo zyakwe mfinjile, zya wugolusu, kabhili nyinza.

<sup>13</sup> Bhuli, akhantu akhinza khangaleeta uwufwe kukwani? Ngakheeka! Imbiibhi zye zyandeteeye uwufwe kwi dala ilyi ndajizyo inyinza. Pe shiniisho, kwi dala ilyi ndajizyo yiniyo, imbiibhi zikhalolekha kuti khantu khabhiibhi nhaani.

\* 7:7 7:7 Bhaazya Kufuma 20:17; Nkumbushizyo 5:21.

<sup>14</sup> Tumanyile **kuti** indajizyo zya Moose zyáletiiuwe **na Mulungu**, ileelo ine **indi** nu wuntu uwi mbiibhi, kwe **kuti** ine ne mutumwa wi mbiibhi. <sup>15</sup> Intakumanya lye inkubhomba, kunongwa ye liila lye indiganile intakulibhomba, lyoli lye indipatile lye inkubhomba. <sup>16</sup> Inga inkubhomba liila lye intaliganile, yikulolesya inkwitikha **kuti** indajizyo yiila nyinza. <sup>17</sup> Ipo yikubha te neene ne inkubhomba lye intaliganile, lyoli mbiibhi yiila ye **yili** mukaasi yaani. <sup>18</sup> Imanyile **kuti** mukaasi yaani, kwe **kuti** mu wuntu waani uwi mbiibhi, litaliipo ilyinza naalimo. She poope inkwanza kubhomba ilyinza, ileelo inkupootwa kulibhomba. <sup>19</sup> Ilyinza liila lye indiganile intakulibhomba, lyoli ibhiibhi liila lye intaliganile lye inkulibhomba. <sup>20</sup> Ishi, inga inkubhomba liila lye intaliganile, te neene inkubhomba ziniizyo, lyoli imbiibhi yiila ye **yili** mukaasi yaani.

<sup>21</sup> Pe shiniisho, naamanya akhantu ikha: we inkwanza kubhomba ilyinza, inkwaga inkusungukha kubhomba ibhiibhi. <sup>22</sup> Mukaasi **mu** mwoyo waani inkuyiseshela indajizyo ya **Mulungu**. <sup>23</sup> Ileelo, impaaswa izya mubhili waani zikutabhaalwa na makha gi mbiibhi zye zikulwa ni nsiibho zyani. Amakha ganaago gakumbiikha **kuti** imbe ne mutumwa wa kubhombela imbiibhi ye yikubhomba imbombo **mu** mubhili waani.

<sup>24</sup> Nasheela ine! Wu naanu we atimposhe ineepe **mu** wiikhalo waani we wakundongola ku wufwe? <sup>25</sup> Inkumusalifwa **uMulungu** we akutupokha twepe **mu** makha gi mbiibhi kwi dala ilya Mwene wiitu uYeesu Kilisiti!

Pe shiniisho, ine nuneene inkulandata indajizyo ya **Mulungu** **mu** nsiibho zyani, ileelo mu wuntu waani uwi mbiibhi, inkubhombela indajizyo yi mbiibhi.



## 8

Kulongolwa nu Mupepu uMufinjile

<sup>1</sup> Pe shiniisho, ishi kutali nu wulonji uwa lufundo ku bhaala bhe bhapatinhiine nu Yeesu Kilisiti.

<sup>2</sup> Yeenya, uMupepu uMufinjile we akubhapa uwuumi uwa wiila, abhabhiishile mubhe mwe bhasatulwe,\* inga muleshe kulongolwa ni mbiibhi zye zikubhaleetela abhantu uwufwe uwa wiila. Abhombile shiniisho kwi dala ilya kupatinhanywa nu Yeesu Kilisiti. <sup>3</sup> Umulungu abhombile liila lye indajizyo zyapotiilwe kulibhomba, kanongwa ye uwatulwe wa wuntu witu uwi mbiibhi wapotiilwe kuzilandata. Amusonteleziizye uMwana waakwe nu mubhili we wulingaanile na mabhili gitu agi mbiibhi, inga abhe mfinjile iya kwefwa imbiibhi. Kwi dala liniilyo akhaziyazya imbiibhi mu wikhalo witu. <sup>4</sup> Umulungu abhombile shiniisho inga zyonti izya wugolosu zye zikwanziwa mu ndajizyo zibhombwaje mukaasi yitu. Itwe tutakulongolwa nu wuntu uwi mbiibhi, lyoli tukulongolwa nu Mupepu uMufinjile.

<sup>5</sup> Kanongwa ye bhe bhakulongolwa nu wuntu uwi mbiibhi, injeele zya bho zikusungukha kubhomba imbiibhi. Heelo, bhe bhakulongolwa nu Mupepu uMufinjile, injeele zya bho zikusungukha kubhomba imbombo zye zikumukhondezya uMupepu uMufinjile. <sup>6</sup> Umuntu we injeele zyakwe zikusungukha kulongolwa nu wuntu uwi mbiibhi, akuyileetela uwufwe. Heelo umuntu we akulongolwa nu Mupepu uMufinjile, ali nu wuumi, kabhili ali nu wutengaanu. <sup>7</sup> Kanongwa ye abhantu bhe bhakulongolwa nu wuntu uwi mbiibhi bhalugu bha Mulungu, bhatakwitikha kulandata indajizyo zyakwe,

---

\* 8:2 8:2 Mubhe mwe bhasatulwe Uwusimbe wumo uwi maandi uwa Shiyunaani wakuti ambiishile imbe ne musatulwe.

khabhili bhatangakhola kuzilandata. <sup>8</sup> Kwe kuti, bhe bhakulongolwa nu wuntu uwi mbiibhi bhatangakhola kamukhondezya uMulungu.

<sup>9</sup> Heelo, imwe mutakulongolwa nu wuntu uwi mbiibhi, lyoli mukutabhaalwa nu Mupepu wa Mulungu, kunongwa ye uMupepu wunuuwo akwikhala mukaasi yiinyu. Umuntu wowonti we atali nu Mupepu wa Kilisiti† wunuuwo te mulandati wa Yeesu Kilisiti. <sup>10</sup> Inga uKilisiti akwikhala mukaasi yiinyu, poope inga amabhili giinyu gakufwa kunongwa yi mbiibhi, ileelo uMupepu uMufinjile akubhapa uwuuni kunongwa ye uMulungu abhabhaziizeye kuti mwe bhagolosu. <sup>11</sup> uMulungu we amuzuyiizeye uYeesu kufuma ku bhafwe. Inga uMupepu waakwe akwikhala mukaasi yiinyu, amabhili giinyu ge gakufwa, uMulungu akhayigazyusa ku makha ga Mupepu wunuuwo.

<sup>12</sup> Pe shiniisho, bhanholo bhaani mu lwitikho, tuli ni lya kubhomba, ileelo te kwikhala anza she uwuntu uwi mbiibhi wakwanza. <sup>13</sup> Kunongwa ye inga mukwikhala kulandata insungukho izya wuntu uwi mbiibhi, mutifwe. Heelo inga mwalekha kubhomba insungukho zye uwuntu uwi mbiibhi wuyiganile ku makha ga Mupepu uMufinjile, mutibhe mwe bhuuni.‡

<sup>14</sup> Bhonti bhe bhakulongolwa nu Mupepu uMufinjile uwa Mulungu bhe bhaana bha Mulungu. <sup>15</sup> Kunongwa ye mutaposheleeye uMupepu uMufinjile we akubhapa uwutumwa we wakuleeta uwoga, lyoli mwaposheleeye uMupepu uMufinjile we akubhabhiikha kubha mwe bhaana bhaakwe. UMupepu wunuuwo we akutwavwa kuti tumubhilishilaje uMulungu kuti, “Aaba,” kwe kuti, “Taata.” <sup>16</sup> UMupepu wuuwo we akusimishiza

† 8:9 8:9 UMupepu wa Kilisiti kwe kuti uMupepu uMufinjile.

‡ 8:13 8:13 Bhaazya Bhagalatiya 6:8.

mu mooyo giitu kuti, itwe twe bhaana bha Mulungu. <sup>17</sup> Pe inga itwe twe bhaana bha Mulungu, twe bhagaali bha Mulungu, twe tukugaala peeka nu Kilisiti. She shiniisho inga twasangaanila mu mayimba ga Kilisiti, pe tukhayisangaanila uwumwamu waakwe woope.

UMulungu akhayibhapa uwumwamu abhaana bhaakwe

<sup>18</sup> Amayimba giitu aga khabhalilo ikha inkulola te khantu kulinganya nu wumwamu we uMulungu akhayitugubulila akhabhalilo khe khakhayinza.

<sup>19</sup> Kunongwa ye ivipelwa vwonti vikugulila ku shisaago akhabhalilo khe uMulungu akhayibhalolesya apazelu abhaana bhaakwe. <sup>20</sup> Kunongwa ye ivipelwa

vwonti vibhishiilwe paasi pa shigune isha kubha vwa shaakha. Te anza she vikwanza viivwo, ndaali, lyoli anza she uMulungu wuuyo akwanza. Peeka na liniilyo, vikugulila na kusubhila akhabhalilo khanaakho,

<sup>21</sup> kunongwa ye vikhayisatulwa mu wutumwa uwa wunanjisu na kuposheela uwusatulwe uwa wumwamu uwa bhaana bha Mulungu.

<sup>22</sup> Tumanyile kuti kufishila akhabhalilo ikha, ivipelwa vwonti vikulila ku mavune, anza mavune aga mwantanda we akupaapa. <sup>23</sup> Khabhili te kuti ivipelwa viniivi wene,

lyoli niitwe bhulo twe tuli nu Mupepu uMufinjile mukaasi yiitu inga tubhonje uwinza we tukhayipeelwa, tukulila ku mavune. Tukulila kunongwa ye tukugulila ku shisaago, uMulungu kutukwilizya kubha twe

bhaana bhaakwe. Panaapo pe tukhayitutulwa kufuma mu wunanjisu wonti, tukhayipeelwa amabhili amapwa.

<sup>24</sup> Usubhilo lunulwo twaluposheleeye akhabhalilo khe twaposhiilwe. ilelo inga tukusubhila akhantu khe khakulolekha, khatakubha kha kusubhila winza. Bhuli, wu naanu we angagulila kuposheela akhantu

khe ali nakho? <sup>25</sup> Ileelo inga tukusubhila kuposheela akhantu khe tutakukhalola, pe tukukhaguuwila ku wujimbiilizu.

<sup>26</sup> Peeka na ziniizyo, uMupepu uMufinjile we akutwawwa mu wutolwe wiitu. Itwe tutamanyile kulaabha she tukwanziwa kulaabha. Ileelo uMupepu uMufinjile wuuyo we akutulaabhila kwa Mulungu ku mavune ge gatakulonjekha. <sup>27</sup> UMulungu we amanyile zye zili mu mooyo ga bhantu, azimanyile insiibho zya Mupepu uMufinjile. Kunongwa ye uMupepu uMufinjile akubhapuutula abhafinjile anza she uMulungu akwanza.

<sup>28</sup> Tumanyile kuti, mu zyonti uMulungu akubhomba imbombo peeka na bhe bhamuganile, kwi dala ilya kubhapa inyinza, bhaala bhe abhabhilishiye kuniibho yaakwe. <sup>29</sup> Kunongwa ye bhanaabho uMulungu abhamanyile kufuma kuwandilo, abhasabhuuye bhakholane nu mwana waakwe, inga uMwana abhe wa kuwandilo mu bhaana bhonti abha Mulungu. <sup>30</sup> Pe shiniisho, bhanaabho bhe abhasabhuuye bhe abhabhilishiye, khabhili bhe abhabhilishiye bhe abhabhaziize kubha bhagolosu, na bhaala bhe abhabaziize kuti bhagolosu akhaabhapa uwumwamu.

*Ataliipo* uwa kutulenhaanya nu lugano lwa Mulungu

<sup>31</sup> Ishi, tulonge tuti bhuli ku zyi nongwa ziniizi? Inga uMulungu ali kumbali yiitu, nalyoli ataliipo umuntu we angakhola kututola. <sup>32</sup> UMulungu atamuloleeye ishisa uMwana waakwe wuuyo, lyoli amufumwizye afwe kunongwa yiitu itwe twenti. Pe inga atupiiye uMwana waakwe wuuyo, bhuli te atiitupe ivintu ivwinza vwonti kushilila kukwakwe! <sup>33</sup> Nalyoli ataliipo umuntu we akhayibhasitaaka abhasabhuulwa bha Mulungu.

U**Mulungu** wu**u**yo we ak**u**bhabhaazya ku**t**i bhagolosu. <sup>34</sup> Khabhili ataliipo umuntu u**w**a kuutupa ulufundo. UYeesu Kilisiti we áfuuye, khabhili akhazy**u**kha, ayikhaaye inyoobhe iya ku**n**diilo iya **Mulungu**, apa lushindikho **u**l**u**piti nhaani, pe akutupuutila.

<sup>35</sup> Ataliipo we angakhola ku**t**ulenhaanya n**u** l**u**gano lwa Kilisiti! Poope t**u**ngabha na mayimba, awe uwuswimiilizu, awe amalabha, awe in**z**ala, awe **u**w**u**laliwe, awe **u**w**u**l**u**g**u**, awe uwufwe. <sup>36</sup> Anza she yisimbilwe mu Wusimbe uWufinjile **ku**t**i**,

“K**u**nongwa yaakho,

uwufwe w**u**t**u**k**u**bhendeela insiku zyonti.

T**u**k**u**bhombelwa akhabhiibhi,

anzi ngoole zye zik**u**bhala k**u**bhoolwa.”§

<sup>37</sup> Ileelo mu ziniizi zyonti, t**u**k**u**tola, k**u** makha ga Kilisiti, we átuganile. <sup>38</sup> Imanyile nalyoli **ku**t**i** khataliipo akhantu**u** khe khangakhola ku**t**ulenhaanya n**u** l**u**gano lwa **Mulungu**: awe uwufwe, awe **u**w**u**p**u**u**u**ma, awe abhakhabhizya, awe amakha aganji aga k**u**mwanya, awe zye zikufumila ishi, awe zye zikhayifumila pilongolela, awe **u**waamulo, <sup>39</sup> awe zye zili k**u**mwanya, awe zye zili paasi, awe ishipelwa ishinji shoshonti, vitangakhola ku**t**ulenhaanya n**u** l**u**gano lwa **Mulungu**. U**l**ugano l**u**n**u**ulwo lwe alufumwizye kwi dala ilya Yeesu Kilisiti, **u**Mwene wi**it**u.

## 9

U**P**aulo ak**u**yimvwa amavune k**u** zya Bhaisilaeli abhasaabhulwa bha **Mulungu**

<sup>1</sup> Ink**u**longa uwanalyoli weene, ine ne impatinhi-ine nu Kilisiti, intak**u**longa lilenga. U**m**woyo waani

§ 8:36 8:36 Bhaazya Zabuuli 44:22.

wukunsimishizya ku wulongozi uwa Mupepu uMufinjile, kuti inongwa ziniizi zya nalyoli. <sup>2</sup> Ine indi nu wuswimiilizu nhaani na mavune ge gatakusila mu mwoyo waani, <sup>3</sup> kunongwa iya bhantu abhi nsi yaani. Yibhanje shigane shaani nuneene, nitikhaga kugunwa na kuzilwa nu Kilisiti, inga kubhomba shiniisho kungabhaavwa bhamwitishe uKilisiti. <sup>4</sup> Bhanaabho bhe Bhaisilaeli. Abheene bhitisihiliilwe nu Mulungu kubha bhaana bhaakwe, abhalanjile uwumwamu waakwe, afinjile nabho, abhapiye indajizyo, abhalanjile she bhamuputu-taje, na kubhapa ulufingo lwakwe.\* <sup>5</sup> Bhanaabho abhaisilaeli bhe bhazukulu bha Abulahaamu, bha Isaaka nu Yaakobo.† Ishimubhili uKilisiti wope Mwisilaeli, we wu Mulungu, umupiti uwa vwonti. Apalwaje wiila na wiila! Zibhe shiniisho.

<sup>6</sup> Ileelo intakuti umulungu apotiilwe kukwilizya umulaji waakwe ku Bhaisilaeli. Ndaali! Kunongwa ye te Bhaisilaeli bhonti bhe bhasaabhulwa bha Mulungu. <sup>7</sup> Poope te kuti ishupaafi shonti isha Abulahaamu bhe bhaana bhaakwe nalyoli. Ndaali! Lyoli umulungu amulajile uAbulahaamu akhati, “Ishipaafi shaakho shikhayifuma kwa Isaaka.”‡ <sup>8</sup> Kwe kuti te bhaana bhaakwe bhonti abha shimubhili bhe bhaana bha Mulungu, lyoli bhe bhapiilwe kulandatana nu mulaji wa Mulungu. <sup>9</sup> Kunongwa ye umulaji nyeene wu wuwu, “Inhayigalukha winza akhabhalilo anza khanaakha umwanha we wakwinza, uSaala akhayibha nu mwana

\* 9:4 9:4 Ulufingo lwakwe Bhaazya ulufingo mu Wilulanyo uwa mazwi amajeni. † 9:5 9:5 ABhaisilaeli bhe bhazukulu bha Abulahaamu, bha Isaaka nu Yaakobo UAbulahaamu amile wu yise wa Isaaka, wope ulsaaka amile wu yise wa Yaakobo. ‡ 9:7 9:7 Bhaazya Wandilo 21:12.

umusakhaala.”§

<sup>10</sup> Khabhili te liniilyo lyene, lyoli woope uLebeeka ápasile abhaana nu maama wiitu ulsaaka. <sup>11-12</sup> ileelo we bhashiili kupaapwa abhooga bhanaabho, khabhili we bhatabhombile ilyinza awe ibhiibhi, uMulungu akhamubhuuzya uLebeeka akhati, “Umusongo akhayimubhombela umunsi.”\* Shiniishi yikulolesya kuti, uMulungu akusaabhala umuntu kulandatana ni nsiibho yaakwe wuuyo, te kulandatana ni njendo zya muntu wuuyo. <sup>13</sup> Anza she yisimbiilwe mu Wusimbe uWufinjile kuti, “Uyaakobo námuganile, ileelo uEsau námupatile.”†

UMulungu akubhomba she ayiganile

<sup>14</sup> Ishi tulonje tuti bhuli? Tuti uMulungu te wa wugolosu? Ndaali! <sup>15</sup> Kunongwa ye ámubhuziize uMoose átili,  
“Inhayimulolela ishisa

umuntu wowonti we inkwanza kumulolela ishisa,  
khabhili inhayimutuyila

umuntu we inkwanza kumutuyila.”‡

<sup>16</sup> Pe shiniisho, yitakusuubhila ishigane sha muntu awe kuyikungula kwakwe, lyoli yikusuubhila ishisa sha Mulungu. <sup>17</sup> Yeenya, mu Wusimbe uWufinjile uMulungu akhamubhuuzya uFalao akhati, “Nákubhiishile ubhe we mwene inga kwi dala lyakho imbalanje abhantu amakha gaani, ni taawa lyani limanyishe insi zyonti.”§ <sup>18</sup> Pe shiniisho, yili apazelu kuti uMulungu akumulolela ishisa umuntu wowonti we akwanza kumulolela ishisa, khabhili akumubhiikha

§ 9:9 9:9 Bhaazyu Wandilo 18:10, 14. \* 9:11-12 9:11-12 Bhaazyu Wandilo 25:23. † 9:13 9:13 Bhaazyu Malaaki 1:2-3. ‡ 9:15 9:15 Bhaazyu Kufuma 33:19. § 9:17 9:17 Bhaazyu Kufuma 9:16.

umwoyo umugomu umuntu wowonti we akwanza kumubhiikha umwoyo umugomu.

<sup>19</sup> Pamu utimbuziilizye kuti, “Inga zili shiniisho, khooni khe uMulungu akutulonga? Kunongwa ye ataliipo we angakhola kudinda ishigane shaakwe?”

<sup>20</sup> Ileelo iwe wumuntu, we naanu we ukufuuyana nu Mulungu? Bhali, akhantu khe khapeliilwe khangakhola kufuuyana nu mupeli na kubhuzilizya kuti, “Khooni khe wampelile shiniishi?”\* <sup>21</sup> Umumati uwi nsonta angakhola kulibhombela itope imbombo she ayiganile, na kumata insonta zibhili kwi tope lyeka liilyo, insonta yeeka ku mbombo indunjisu, iyamwabho ku mbombo zye zitalunjishile.

<sup>22</sup> Shiniisho she zili kwa Mulungu. Akhazaga kubhalanga abhantu umulakha waakwe na kubhamanyisa amakha gaakwe, ileelo abhajimbiliye nhaani bhaala bhe bhali ngati viliilo viila iwva lufundo vwe vwabhatishiliilwe kuyazwa. <sup>23</sup> Abhombile shiniisho kunongwa ye akhazaga kulolesya uwumwamu waakwe uwupiti ku bhaala bhe akhazaga kubhalolesya ishisa, bhe abhalinganyiinye nziila kubhapa uwumwamu waakwe. <sup>24</sup> Abhantu bhanaabho bhe abhasabhuuye, kwe kuti itwe twenti tuBhayahuudi na bhe te Bhayahuudi.

<sup>25</sup> Anza she akulonga mu shitaabu isha mukuwi uHoseeya kuti,

“Bhaala bhe te bhantu bhaani,  
inhayibhatekha kuti, ‘Bhantu bhaani.’

Abhantu bhe intabhaganile,  
inhayibhatekha kuti,  
‘Bhantu bhaani bhe imbaganile.’”†

<sup>26</sup> Khabhili,

\* 9:20 9:20 Bhaazya Yeesaya 29:16; 45:9. † 9:25 9:25 Bhaazya Hoseeya 2:23.



“Paala pe bhabhabhuuzya kuti,  
 ‘Imwe te mwe bhantu bhaani,’  
 ipo bhakhayibhilishilwaga kuti,

‘Bhaana bha Mulungu we mwumi.’” †

27 Wooke umukuwi uYeesaya akulonga shiniishi ku zyi  
 ntumi izya Bhaisilaeli kuti,

“Poope she aBhaisilaeli bhinji,

anzu muselesenga uwa umbali mwa sumbi,

poope shiniisho bhashe buulo bhe

bhakhayituulwa.

28 Kunongwa ye uMwene uMulungu akhayibhapa  
 ulufundo lwakwe mu nsi nalubhilo,  
 khabhili ku wukwilizu.” §

29 Khabhili anza she umukuwi uYeesaya atanguliye  
 kulonga kuti,

“Kunongwa ye inga uMwene uwa makha gonti

atuleshelaje abhaana bhashe abha Bhaisilaeli,

nhani tusilile,

anza bhantu abha mu nhaaya iya mu Sodoomu

ni ya mu Gomoola.”\*

*Akhantu* khe khábhaziizye aBhaisilaeli abhinji  
 bhatabhaaziwe uwugolosu

30 Ishi tulonge tuti bhuli? Kwe kuti, abhantu bhe  
 te Bhaisilaeli bhatáyikunguuye kwanza uwugolosu,  
 bhabhaaziwe uwugolosu kwi dala ilya lwitikhó. 31 Lyoli  
 aBhaisilaeli bhe bháyikunguuye kulandata indajizyo  
 inga bhabhaaziwe uwugolosu, bhápotiilwe. 32 Khooni  
 khe bhápotiilwe kubhaaziwa uwugolosu? Kunongwa

† 9:26 9:26 Bhaazya Hoseeya 1:10. § 9:28 9:27-28 Bhaazya Yeesaya

10:22-23. \* 9:29 9:29 Inhaaya iya mu Sodoomu ni ya mu  
 Gomoola nhaaya zye uMulungu ázilonjile kunongwa iyi  
 mbiibhi zya bhantu bhaabho. Bhaazya Wandilo 19:24-29;  
 Yeesaya 1:9.

ye bhásu**bh**iye imbombo zyabho, sita kus**u**ubhila  
 ul**wi**tikho. Bhakhakuntila mwi we<sup>†</sup> liila, bhakhagwa.  
<sup>33</sup> Anza she yisimbilwe mu Wusimbe uWufinjile **ku**ti,  
 “Yeenyi, kun**u**ukwo mu nhaaya iya mu Sayuuni<sup>‡</sup>  
     ink**u**bhiikha iwe lye abhant**u** bhatikuntilaje.  
     Iwe liniili lit**ib**hazyaje abhant**u** **ku**ti bhagwanje.  
 Poope shin**i**isho, umuntu wowonti we ak**u**mwit**ik**ha  
     w**u**n**u**yo we liwe lin**i**ilyo,  
     te akhas**u**pile naalumo!”<sup>§</sup>

## 10

<sup>1</sup> Bhanholo bhaani mu lwit**ik**ho, zye inkwanza nhaani  
 mu mwoyo waani, ni mpuuto zyani kwa Mu**l**ungu,  
 ku **ku**ti abhamwit**u** aBhaisilaeli bhawaaje uwuposhi.  
<sup>2</sup> Kunongwa ye ink**u**bhalola **ku**ti bhak**u**yikungula  
 k**u**mwanza u**M**ulungu, ileelo bhatamanyile she  
 u**M**ulungu akwanza bhamwanzaje. <sup>3</sup> Kunongwa ye  
 abheene bhatamanyile she u**M**ulungu ak**u**bhabhaazizya  
 abhant**u** uwugolosu, bhakhanza idala iya wugolosu  
 waabho bh**i**bho. Bhásiitile kulandata idala lya Mu**l**ungu  
 iya k**u**bhabhaazizya abhant**u** uwugolosu. <sup>4</sup> Kwi dala iya  
 kw**i**nza kwa Kilisiti, indajizyo zikhafishila pa wusililishilo  
 waakwe, inga bhonti bhe bhak**u**mwit**ik**ha bhabhaaziwe  
 uwugolosu.

*Abhant**u*** bhonti bhangakhola k**u**waaga uwuposhi

<sup>5</sup> Ku zyi ntumi iya k**u**posheela uwugolosu kwi dala  
 iya kulandata indajizyo, u**M**oose ásimbile át**i**li, “Umuntu  
 we ak**u**zilema zyonti zye zisimbilwe mu ndajizyo,  
 atiy**i**khalaje kwi dala iya k**u**zilema ziniizyo.”\* <sup>6</sup> ileelo

<sup>†</sup> 9:32 9:32 Iwe Izwi liniili kwe **ku**ti uKilisiti. <sup>‡</sup> 9:33 9:33 ISayuuni  
 itaawa ilyamwabho ilyi nhaaya iya Yelusaleemu. <sup>§</sup> 9:33  
 9:33 Bhaazya Yeesaya 8:14; 28:16. \* 10:5 10:5 Bhaazya Bhalaawi 18:5.

ku zya wugolosu we wukufumilana nu lwitikho, uMoose ásimbile átili, “Utalongaje mu mwoyo waakho kuti, ‘Wu naanu we akhayizubha kumwanya?’ ” Kwe kuti, kumuleeta uKilisiti mu nsi. <sup>7</sup> “Awe kuti, ‘Wu naanu we atiyiishe kwilongo?’†” Kwe kuti, kumuzyuuya uKilisiti kufuma ku bhafwe. <sup>8</sup> Heelo uWusimbe uWufinjile wakuti, “Izwi liniilyo ilya Mulungu lili papiipi niwe, lili mwi lomu lyakho na mu mwoyo waakho.”‡ Izwi liniilyo lye lizwi lya lwitikho lwe tukulumbiilila. <sup>9</sup> Kunongwa ye inga walaata kwi lomu lyakho waneewe kuti, “UYeesu wu Mwene,” na kwitikha mu mwoyo waakho kuti uMulungu amuzuyiizye kufuma ku bhafwe, uMulungu atikuposhe. <sup>10</sup> Kunongwa ye ku mwoyo umuntu akwitikha, pe akubhaaziwa uwugolosu, khabhili na kwi lomu lyakwe wuuyo akulaata, pe akuposheela uwuposhi. <sup>11</sup> UWusimbe uWufinjile wakulonga izya Kilisiti kuti, “Wowonti we akumwitikha te akhasupile naalumo.”§ <sup>12</sup> Kwe kuti kutali nu wuleganu uwa Bhayahuudi na bhe te Bhayahuudi. Uweene wu Mwene wa bhantu bhonti, khabhili muteti ku bhonti bhe bhakumulaabha. <sup>13</sup> UWusimbe uWufinjile wakuti, “Umuntu wowonti we akhayilaata na kumusubhila uMwene akhayitaulwa.”\*

<sup>14</sup> Bhuli, abhantu bhangamupuuta bhuliibhuli ula we bhatamwitishile? Khabhili bhangamwitikha bhuliibhuli inga bhatimvwizye intumi zyakwe? Khabhili bhangimvwa bhuliibhuli inga kutali nu mulumbiilili? <sup>15</sup> Khabhili bhanganalumbiilila bhuliibhuli inga bhasonteleziizwe? Anza she yisimbilwe mu

† 10:7 10:7 Kwilongo Bhaazya mu Wilulanyo uwa mazwi amajeni. ‡ 10:8 10:6-8 Bhaazya Nkumbushizyo 9:4; 30:12-14.

§ 10:11 10:11 Bhaazya Yeesaya 28:16. \* 10:13 10:13 Bhaazya Yoeli 2:32.

## Bhaluumi 10:16 36 Bhaluumi 10:21

Wusimbe uWufinjile **ku**ti, “Khinza nhaani kwinda bhaala bhe bhakulumbiilila iNtumi iNyinza!”† 16 Ileelo te Bhaisilaeli bhonti bhítishile iNtumi iNyinza yiniyo. Kunongwa ye umukuwi uYeesaya álonjile átili, “We Mwene, wu naanu we ayitishile intumi zyitu?”‡ 17 Pe shiniisho, ulwitikho lukufumilana na kwimvwa izwi, izwi liniilyo zye Ntumi iNyinza izya Kilisiti.

18 Ileelo inkubhuziilizya **ku**ti, bhuli, aBhaisilaeli bhatimvwizye? Nalyoli bhimvwizye, kunongwa ye uWusimbe uWufinjile wakuti, “Intumi zyaabho zisaatile mu nsi zyonti, amazwi gaabho gasaatile mumbali zyonti izya mu nsi zyonti.”§

19 Khabhili inkubhuziilizya **ku**ti, bhuli, aBhaisilaeli bhatazyaganyiinye? Ndaali, bhazyaganyiinye, kunongwa ye mu khabhalilo akha Moose umulungu átili, “Intibhabhiishe imwe mubhe nu mwone ku bhantu bhe te bhantu bhaani. Intibhabhiishe imwe mubhaviitilwe, abhantu bhe bhatakyaganya.”\*

20 Wooke umukuwi uYeesaya akulonga ku wudandamazu amazwi ga Mulungu **ku**ti, “Abhantu bhe bhatakunanza, bhanaajile.

Injibhiishile apazelu

ku bhantu bhe bhatakuhuziilizya intumi zyani.”†

21 Ileelo ku zya Bhaisilaeli, umulungu akulonga **ku**ti, “Musanya wonti inbhahapalizyaga kubhabhilishila abhantu bhe bhatali nu lutinikho,

---

† 10:15 10:15 Bhaazya Yeesaya 52:7. ‡ 10:16 10:16 Bhaazya Yeesaya 53:1. § 10:18 10:18 Bhaazya Zabuuli 19:4. \* 10:19 10:19 Bhaazya Nkumbushizyo 32:21. † 10:20 10:20 Bhaazya Yeesaya 65:1.

khabhili abha madali.”‡

## 11

UMulungu atabhaleshile abhantu bhaakwe aBhaisilaeli

<sup>1</sup> Ishi inkubhuzilizya, bhuli, uMulungu akubhasiita abhantu bhaakwe? Ndaali! Ine nuneene ne Mwisilaeli, kufuma mu shipaafi sha Abulahaamu, ishikholo sha Benjamiini. <sup>2</sup> UMulungu atabhasiitile abhantu bhaakwe bhe abhasabhuyeye kufuma kuwandilo. Bhuli, mutakukumbukha she uWusimbe uWufinjile wukulonga ku zya Eliya, she amudwejeeye uMulungu ku zya Bhaisilaeli? <sup>3</sup> Akhati, “Mwene, bhahagajile abhakuwi bhaakho, na kupongolanya ishigemo shaakho. Insyalile ine numwene, poope shiniisho bhakwanza kangoga niine!”\* <sup>4</sup> Bhuli, uMulungu akhamwamula akhooni? Akhati, “Injibhishiye abhantu ielufu saba (7,000) bhe bhatakumupuuta uBaali.”†

<sup>5</sup> Niishi bhulo she zili, bhasyalile bhashe bhe uMulungu abhasabhuyeye ku wiila waakwe. <sup>6</sup> Ileelo inga bhasabhuliilwe ku wiila, te yibhe kunongwa iyi mbombo zyaabho. Kunongwa ye inga bhasabhulwaje ku mbombo zyaabho, pe uwiila nhani te wiila winza. <sup>7</sup> Tulongje izyoni ishi? Uwugolosu we aBhaisilaeli bhawanzile ku makha bhatawaajile. Bha bhaala bhe bhásabhuliilwe nu Mulungu bhe bháwaajile. Abhanji bhonti bhe bhásyalile akhabhabhika bhabhe bhagomu amooyo, <sup>8</sup> anza she yisimbiilwe mu Wusimbe uWufinjile kuti,  
“UMulungu agabhiishile amooyo gaabho kubha magomu,  
bhalemiilwe nu tulo,

‡ 10:21 10:21 Bhaazya Yeesaya 65:2. \* 11:3 11:3 Bhaazya 1 Bhamwene 19:10, 14. † 11:4 11:4 Bhaazya 1 Bhamwene 19:18.

paka musanyuunū  
 akhabhiikha amiiso gaabho gatalolaje,  
 na makutwe gaabho gatimvwaje.”‡

<sup>9</sup> Wooke umwene uDaudi átili,

“Ivikulukulu vwabho,  
 umulungu avigalulanye vibhe shitego isha  
 kubhalema  
 inga bhagwe na kufundwa.

<sup>10</sup> Amiiso gaabho gabhe na khiisi,  
 inga bhatalolaje naakhamu,  
 amasana gaabho gagobhe insiku zyonti  
 ku mayimba gaabho.”§

Kukhaana aBhaisilaeli kugalunhiine kubha nsayo ku  
 bhe te Bhaisilaeli

<sup>11</sup> Ishi, inkubhuzilizya winza, bhuli, aBhaisilaeli  
 bhákuntiiye, bhakhagwa nziila? Ndaali! fleelo kunongwa  
 iya kumukhaana kwabho uMuposhi, uwuposhi wub-  
 hafishiiye abhantu bhe te Bhaisilaeli, inga aBhaisilaeli  
 bhoope bhasungushe kuposheela uwuposhi. <sup>12</sup> Ishi, inga  
 kumukhaana kwabho uMuposhi aBhaisilaeli kubhapiiye  
 insayo abhantu abhi nsi zyonti, kabhili inga kuyaga  
 kwabho kuleetile uwiila ku bhantu abhi nsi zyonti,  
 kubhagalusa kukhayileeta uwiila uwupiti nhaani.

<sup>13</sup> Ishi, inkulonga niimwe mubhantu mwe te mwe  
 Bhayahuudi. Kunongwa ye ne musundikwa wiinyu ku  
 bhantu bhe te Bhayahuudi, inkuyibaadila imbombo  
 yaani. <sup>14</sup> Inkusuubhila kuti aBhayahuudi abhamwitu  
 bhasungushe kuposheela uwuposhi anziimwe, inga ab-  
 hanji mukaasi yaabho bhawaaje uwuposhi wanuwo.  
<sup>15</sup> Kunongwa ye kukhaanwa kwabho kubhapiiye abhantu

‡ 11:8 11:8 Bhaazya Nkumbushizyo 29:4; Yeesaya 29:10.

§ 11:10 11:9-10 Bhaazya Zabuuli 69:22-23.

abhi nsi zyonti kwimvwanywa nu Mulungu, zikhayibha bhuliibhuli we bhimvwana nu Mulungu? Yikhayibha ngati bhafwe, bhakhayizyukha! <sup>16</sup> Inga umuntu aafumwa imbakuuli iya kwanda iya wusu uwi ngano kubha mfinjile, pe uwusu wonti wakubha wufinjile. Amatandalaazi agi kwi ilya muzeituni inga gabha mafinjile, impaaswa zyakwe zyoze zikubha mfinjile.

<sup>17</sup> Ishi impaaswa zimo zidumuliilwe, imwe mwe te mwe Bhayahuudi mwe mpaaswa izya muzeituni uwa mwi laala zye zisopiilwe pakaasi pa mpaaswa zye zisyalile. Ishi mukwaaga uwunonu uwa muzeituni uwa kuwaalwa. <sup>18</sup> Pe shiniisho, mutasholanyaaje impaaswa zye zidumuliilwe. Imwe mutali na kha kuyibaadila, kunongwa ye te mwemwe mukulemeelela pa wumelelwi, lyoli uwumelelwi we wakubhalemeelela imwe. <sup>19</sup> Pamu utiti, “Impaaswa ziniizyo zikhadumulwa inga ine insopenhanywe ni shimelelwi shiniisho.” <sup>20</sup> She zili! Impaaswa ziniizyo zydumuliilwe kunongwa iya kusiita kwitikha. Lyoli iwe uyimiliye ku lwitikho lwakho. Pe shiniisho, utayibaadaje, lyoli ubhe amiiso. <sup>21</sup> Kunongwa ye inga uMulungu atazituyiye impaaswa izya kuwandilo, niwe angakhola kukubhomba shiniisho.

<sup>22</sup> Yeenyi uwutonsu nu wukhali wa Mulungu, uweene mukhali ku bhaala bhe bhaguuye, khabhili mutonsu kukwakho iwe inga utijendelele kusubhila uwutonsu waakwe. Ilelo inga utabhomba shiniisho, niwe utidumulwe. <sup>23</sup> Bhoope aBhayahuudi inga bhagalunhana na kumwitikha uMulungu, bhatiwaalwe winza pa shimelelwi. Kunongwa ye uMulungu ali na makha aga kubhawaala winza. <sup>24</sup> Iwe we te we Muyahuudi ali ngati lapaaswa ulwa muzeituni uwa mwi laala. Bhakwefwizye kunuuwo, uwaliilwe winza mu muzeituni uwa kuwaalwa she poope kubhomba shiniisho shijeni. Ilelo

aBhayahuudi bhali ngati muzeituni uwa kuwaalwa, yikhayibha mbombo mpupuusu kuwaalwa winza mwi kwi lyabho bhiibho.

**UMulungu** ali ni shisa ku bhantu bhonti

<sup>25</sup> Bhanholo bhaani mu lwitikho, inkwanza mumanye uwanalyoli uwu we wafisishile, mutakhashe muyilole mwe bhi njeele nhaani. ABhaisilaeli bhamu bhatijendelele kubha bhagomu mu mooyo kufishila pe wukwile uwinji uwa bhantu bhe te Bhaisilaeli we bhinza kwa Mulungu. <sup>26</sup> Kwi dala liniilyo, aBhaisilaeli bhonti bhatiwaaje uwuposhi. Anza she yisimbilwe mu Wusimbe uWufinjile kuti,

“UMuposhi atifume mu nhaaya iya mu Sayuuni,  
atiyeefwe uwusambusu uwa shipaafi sha Yaakobo.

<sup>27</sup> Ulu lwe lufingo lwe intibhombе nabho,  
we neefwa imbiibhi zyabho.”\*

<sup>28</sup> Kunongwa ye bhakuzikhaana iNtumi iNyinza, aBhaisilaeli bhabha bhalugu bha Mulungu, ku wukabhi wiinyu imwe mwe te mwe Bhaisilaeli. Heelo kunongwa ye uMulungu abhasabhuuye abhamaama bhaabho, uweene ali she wu manyani waabho. <sup>29</sup> Kunongwa ye uMulungu inga abhasebha abhantu na kubhasaya, atangakhola kugalanhana. <sup>30</sup> Imaandi imwe mutakhamutinikhaga uMulungu, ileelo ishi muposheleeye ishisa sha Mulungu kunongwa ye aBhaisilaeli bhatakhamutinikha. <sup>31</sup> Shiniisho, anza she uMulungu abhaloleeye imwe ishisa, bhoope aBhaisilaeli uMulungu atibhalolele ishisa anziimwe. <sup>32</sup> Kunongwa ye uMulungu abhabhiishile abhantu bhonti bhabhe bhakungwe ku mbiibhi zyabho inga bhonti bhaposheele ishisa.

\* 11:27 11:26-27 Bhaazya Yeesaya 27:9; 59:20-21; Yelemiya 31:33-34.



UMulungu apalwaje

<sup>33</sup> Uwudumbwe, injeele nu wumanyi wa Mulungu vipiti nhaani! Uwulonji waakwe wutakulonjekha, amadala gaakwe gatakumanyikha! Anza she uWusimbe uWufinjile wukulonga kuti,

<sup>34</sup> “Wu naanu we azimanyile insiibho zya Mwene?

Wu naanu we angamupanza?”†

<sup>35</sup> “Wu naanu we amupabhiye uMulungu akhantu, khe uMulungu akhondeeye kutabhula?”‡

<sup>36</sup> Kunongwa ye ivintu vwonti vikufuma kukwakwe.

Vikujendelela kubha ku makha gaakwe,

khabhili ivintu vwonti vilipo ku wumwamu waakwe.

Uwumwamu wali na wuuyo wiila! Zibhe shiniisho.

## 12

Kumubhombela uMulungu

<sup>1</sup> Ishi bhanholo bhaani mu lwitikho, inkubhalamba ku shisa sha Mulungu, muyifumwaje muneemwe ngati mfinjile iya kulungulizya ye mpuma, khabhili mfinjile ye yikumukhondezya uMulungu. Kubhomba shiniisho lye lidala ilya nalyoli ilya kumupuuta. <sup>2</sup> Mutenyezyaje winza zye zikumubhombwa na bhantu abha mu nsi umu, lyoli uMulungu abhagalulanye mu mooyo giinyu, inga mubhe ni nsibho impwa. Ipo pe mutimanye ishigane sha Mulungu. Mutimanye zye nyinza, zye zikumukhondezya uMulungu, khabhili zye zya wukwilizu.

<sup>3</sup> Kufumilana nu wiila we impewiilwe nu Mulungu kubha ne musundikwa, inkubhabhuzya mwenti kuti: muleshe kuyibaada kuti mukhondeeye kushila she

† 11:34 11:34 Bhaazy a Yeesaya 40:13. ‡ 11:35 11:35 Bhaazy a Ayuubu 41:11.

muli, lyoli musibhililaje ku njele. Weeka weeka apewi-ilwe ishipimilo shaakwe isha lwitikho nu Mulungu. <sup>4</sup> Umubhili wuli weeka, ileelo wuli ni mpaaswa inyinji. Impaaswa yeeka yeeka yili ni mbombo yaakwe. <sup>5</sup> Shiniisho she zili nu mubhili wa Kilisiti. Itwe twe mpaaswa inyinji izya mubhili waakwe weeka. Mu mubhili uwu, umuntu weeka weeka mpaaswa kwa wamwabho.

<sup>6</sup> Pe shiniisho, tuli ni vikunjilwa niivwo niivwo anza she umulungu atupiiye ku wiila waakwe. We ali ni shikunjilwa isha wukuwi, afumwaje uwukuwi, anza she ulwitikho lwakwe luli. <sup>7</sup> We ali ni shikunjilwa isha kubhombela abhanji, abhombelaje. We ali ni shikunjilwa isha kumanyizya, amanyizyaje. <sup>8</sup> We ali ni shikunjilwa isha kubhaginjizya abhanji, abhaginjizyaje. We ali ni shikunjilwa isha kubhagabhila abhanji, abhombaje shiniisho ku wuteti. Umwimiilili ayimililaje ku mwoyo uwa uyikungula. Woope we ali ni shikunjilwa isha shisa, alolesyaje ishisa ku lusesshelo.

### Kuganana

<sup>9</sup> Ulugano lwinyu latabhanje lwi lenga, muzivitalwaje imbiibhi, mubhombaje zye nyinza. <sup>10</sup> Mugananaje muneemwe na muneemwe anza bhanholo. Umuntu weeka weeka ayikungulaje kumutinikha uwamwabho. <sup>11</sup> Matabhanje mwe bhakhata, lyoli muyikungulaje, muyifumwaje mu mooyo giinyu kumubhombela umwene. <sup>12</sup> Museshelaje kunongwa ye muli nu lusubhilo, mubhanje nu wujimbiilizu mu mayimba. Mupuutaje insiku zyonti. <sup>13</sup> Mubhavwaje abhafinjile abhamwinyu mu vve bhabhulililwe. Khabhili mubhaposheelaje abhajeni ku wuteti.

<sup>14</sup> Mumulaabhe umulungu abhasaye bhe bhakubhayimvwa, mubhalabhilaje insayo,

m~~u~~t~~a~~b~~h~~a~~l~~a~~b~~h~~i~~l~~a~~j~~e~~ ishigune abhant~~u~~. <sup>15</sup> Seshelaji peeka na bhe bhak~~u~~seshela. Lilaji peeka na bhe bhak~~u~~lila. <sup>16</sup> Mwikhalaje ku wutengaanu m~~u~~neemwe na m~~u~~neemwe. Mutayibaadaje, lyoli mwit~~i~~she kubha peeka na bhant~~u~~ bhe abhanji bhatakubhashindikha. Mutabhanje mwe bhant~~u~~ abha kuyibaada kuti mumanyile zyonti.

<sup>17</sup> Umuntu inga akubhombela uwubhiibhi utamutab~~h~~ulizyaje kamubhombela uwubhiibhi. Lyoli musibh~~i~~lilaje nhaani kubhomba zye nyinza ku bhant~~u~~ bhonti. <sup>18</sup> Inga yikwit~~i~~nhana kukwinyu, mwikhalaje ku wutengaanu na bhant~~u~~ bhonti. <sup>19</sup> Bhaganwa bhaani, mutaland~~u~~zyaje, lyoli mum~~u~~leshelaje uM~~u~~lungu zyonti ziniizyo. Kunongwa ye yisimbiilwe mu Wusimbe uWufinjile kuti, “Kuland~~u~~zya mbombo yaani, ine inhayiland~~u~~zya, akulonga uMwene.”\* <sup>20</sup> Khabhili uWusimbe uWufinjile wakuti,

“Um~~u~~lungu waakho inga ali ni nzala, muliisye.

Inga ali ni sh~~u~~milwa, m~~u~~mwensye.

Kunongwa ye inga wabhomba shiniisho,

utimubhiishe alope insoni nhaani

ngati wamutwinha umwoto uwa mazimwa

pi twe lyakwe.”

<sup>21</sup> Utakhiit~~i~~she kutolwa nu wubhiibhi, lyoli uwutole uwubhiibhi kwi dala ilya kubhomba inyinza.

## 13

### *Kubhatinikha abhalongozi abhi silikaali*

<sup>1</sup> Umuntu weeka weeka akwanziwa kubhatinikha abhalongozi abhi silikaali. Kunongwa ye uwaamulo waabho wonti uwa kutabhaala wukufuma kwa M~~u~~lungu.

\* <sup>12:19</sup> <sup>12:19</sup> Bhaazy~~a~~ Nk~~u~~mbushizyo 32:35.

Uweene we abhabhiishile bhonti bhe bhali nu waamulo. <sup>2</sup> Umuntu wowonti we akubhasambukha abha waamulo anza bhanaabho, akusambukha ulubhaatikho lwa Mulungu we abhabhiishile. Abhantu bhe bhakubhomba shiniisho bhakuyileetela bhiibho kuti bhakhalongwe nu Mulungu. <sup>3</sup> Kunongwa ye abhalongozi bhatakubhoogofwa abhantu bhe bhakubhomba inyinza, lyoli bhaala bhe bhakubhomba imbiibhi. Pe inga utayiganile kuti akwogofwe, bhombaga inyinza, wope atikupaale. <sup>4</sup> Kunongwa ye umulongozi mubhombi wa Mulungu, akubhomba imbombo kukwawwa iwe. ileelo, inga akubhomba imbiibhi, yoogopa! Kunongwa ye umulongozi wanyuwo angakhola kubhombela uwaamulo, aakupe ulufundo. Uweene mubhombi wa Mulungu, kubhaleetela umulakha wa Mulungu bhe bhakubhomba imbiibhi. <sup>5</sup> Pe shiniisho, yikwanziwa kubhatinikha abhalongozi. Te kunongwa iya kwogopa ulufundo lwa Mulungu kwene, lyoli kunongwa ye mumanyile mu mwoyo kuti uMulungu akwanza mubhombaje shiniisho.

<sup>6</sup> Kunongwa yiniyo, imwe mukufumwa insonho. Abhalongozi bhanaabho bhakumubhombela wu Mulungu wanyuwo, inga bhakukwilizya imbombo yaabho she yikwanziwa. <sup>7</sup> Mumupanje weeka weeka khe khamukhondeeye. Inga bhakubhiisya insonho, mufumwaje, inga nsonho iya viyabho, yope mufumwaje. Khabhili inga kuli uwa kumwogopa, mwogopaje, wope we akhondeeye ulushindikho, mumushindikhaje.

**Kwikhala mu lugano**

<sup>8</sup> Mutabhanje ni deeni kwa muntu wowonti, lyoli mubhe ni deeni iya kuganana. Kunongwa ye we akumugana uwamwabho akukwilizya indajizyo. <sup>9</sup> Kunongwa ye indajizyo zye zikuti, "Utakhabhembushe,

utakhaagoje, utakhiibhe, awe utasungukhaje akhantu kha wamwinyu.”\* Heelo indajizyo ziniizi ni zyamwabho zyonti zili mu ndajizyo yeeka ini ye yikuti, “Umugane uwamwinyu anza she uyiganile wuneewe.”† 10 We akumugana uwamwabho, atakumabhombela akhabhi-ibhi. Pe shiniisho, ulugano lye lidala ilya kukwilizya indajizyo zya Mulungu.

11 Mukwanziwa kubhomba ganaaga, kunongwa ye mumanyile akhabhalilo khe tuli nakho, isaala iya kadaamukha yifishile. Ishi uwuposhi wiitu wapalamiye kushila akhabhalilo khe twandile kwitikha. 12 Ishi uwusiku wusililile, umusanya wapalama. Ishi, taleshe imbombo imbiibhi izya mu khiisi, tukwate ivilwilo ivwa lukhozyo. 13 Tubhe ni njendo inyinza zye zikhondeeye akhabhalilo akha shamusanya. Tutabhanje twe bhantu bhe bhalyovi nu wumwezi. Tutabhombaje naazimo izya walondo awe kubhomba izyi nsoni. Tutabhanje ni bho awe umwone. 14 Lyoli ishi, mu wikhalo wiinyu wonti, mulongolwaje nu Mwene uYeesu Kilisiti, mutalongolwaje nu wuntu wiinyu uwi mbiibhi, ni nsungukho zyakwe.

## 14

Mutabhalongaje abhamwinyu mu lwitikho

1 Mumuposheelaje uwamwinyu we atagomile mu lwitikho. Mutadalinhanaje nawo ku zyi nsiibho zyakwe. 2 Umuntu we agomile mu lwitikho akulola lukumwitishizya kulya khokhonti. Heelo uwunji we atagomile mu lwitikho, akulola lukumwitishizya kulya inyenyi izya matundu nyeene. 3 Wunuuyo we akulya

\* 13:9 13:9 Bhaazya Kufuma 20:13-17; Nkumbushizyo 5:17-21.

† 13:9 13:9 Bhaazya Bhalaawi 19:18.

khokhonti atamusholanyaaje ula we akulya inyenye izya matundu nyeene. Wope we akulya inyenye izya matundu nyeene, atamulongaje ula we akulya khokhonti, kunongwa ye uMulungu amuposheleeye anza she ali. <sup>4</sup> Iwe we naanu we ukumulonga umubhombi wa muntu uwunji? Umwene waakwe we amumanyile kuti umubhombi waakwe ayimiliye akhinza awe aguuye. Khabhili umubhombi wunuyo akwimilila akhinza, kunongwa ye uMwene uYeesu ali na makha aga kumwimilisa.

<sup>5</sup> Umuntu umo akulola isiku limo kubha lifinjile nhaani kushila insiku izyamwabho, ileelo umuntu uwamwabho akulola insiku zyonti zilingaanile. Umuntu weeka weeka alandataje she akulola wunuyo. <sup>6</sup> Umuntu wunuyo we akulola kuti isiku limo lili nu wumwamu nhaani, akubhomba shiniisho kunongwa iya kumushindikha uMwene. Wope we akulya khokhonti, akulya kumushindikha uMwene, kunongwa ye akumusalifwa uMulungu. Wope we atakulya, atakulya kunongwa iya kumukhondezya uMwene, wope akumusalifwa uMulungu. <sup>7</sup> Kunongwa ye ataliipo umuntu pakaasi yitu we akwikhala kunongwa yaakwe wunuyo, awe ataliipo umuntu we akufwa kunongwa yaakwe wunuyo. <sup>8</sup> Kunongwa ye inga twe bhuumi, twe bhuumi kunongwa iya wumwamu wa Mwene uYeesu, khabhili inga tukufwa, tukufwa kunongwa iya wumwamu wa Mwene. Pe shiniisho, inga twe bhuumi awe tukufwa, itwe twe bhantu bha Mwene. <sup>9</sup> Kwe kuti, ukilisiti afuuye na kuzukha, inga abhe wa Mwene wa bhafwe na bhuumi.

<sup>10</sup> Ishi khooni khe iwe ukumulonga unholo waakho mu lwitikho? Khabhili khooni khe ukumushoolanya? Itwe twenti tukhayimilila pilongolela pi tengu iya wulonji iya Mulungu. <sup>11</sup> Kunongwa ye yisimbiilwe mu

Wusimbe uWufinjile **kuti**,  
 “**U**Mwene ak**u**longa **kuti**,  
     ‘Anza she ne mwumi,  
     umuntu weeka weeka akhayis**u**gamila  
     p**i**longolela yaani.  
     Khabh**i**li umuntu weeka weeka akhay**i**it**i**kha  
     ku lumili lwakwe  
     **kuti** ine ne **Mu**lung**u**.’ ”\*

<sup>12</sup> Pe shini**i**sho, umuntu weeka weeka mukaasi **y**i**i**t**u**,  
 akhay**i**longa w**u**yo imbombo zyakwe pamiiso ga  
**Mu**lung**u**.

*Utamuvisyaje uwamwinyu*

<sup>13</sup> Pe shini**i**sho, t**u**leshe **k**ulongana t**u**neetwe na  
 t**u**neetwe. Khabh**i**li twam**u**le **k**ulekha **k**ubhomba  
 khokhonti khe khak**u**mwazya **u**nholo **w**i**i**t**u** **m**u **l**w**i**t**i**kho  
 kukunt**i**la awe **k**ubhomba imbi**i**bhi. <sup>14</sup> Kufumilana **n**i  
 many**i**z**y**o zya Mwene u**Y**eesu, imany**i**le nalyoli **k**u**t**i  
 shital**i**ipo ishaakulya shoshonti she shikhandamanu.  
 ileelo inga umuntu ak**u**lola ishaakulya shimo **k**u**t**i  
 shikhandamanu, pe ishaakulya shini**i**sho **k**u**k**wakwe  
 sh**i**t**i**bhe shikhandamanu. <sup>15</sup> Pe shini**i**sho, inga iwe  
**u**k**u**mw**i**lizya **u**nholo **w**i**i**t**u** **m**u **l**w**i**t**i**kho  
**k**unongwa iya shaakulya she ukulya, ipo iwe  
**u**tak**u**bhomba **k**u **l**ugano. Kwi dala ilya shaakulya  
 shaakho **u**takham**u**teez**y**e umuntu we u**K**ilisiti  
 á**u**f**w**ili**y**e! <sup>16</sup> Pe shini**i**sho, iwe **u**tak**h**i**t**ishiz**y**e  
 akhant**u** khe **u**k**u**khalola khinza khalongwe na bhanji  
**k**u**t**i khabhi**i**bhi. <sup>17</sup> **K**unongwa ye **u**w**u**mwene wa  
**Mu**lung**u**† te kulya awe **k**u**u**wela, lyoli **k**u **k**ubhomba  
 uwugolosu, **k**ubha nu wutengaanu **n**u **l**useshelo vwe

\* 14:11 14:11 Bhaazya Yeesaya 45:23; 49:18. † 14:17 14:17 **U**w**u**mwene  
 wa **Mu**lung**u** Bhaazya mu Wilulanyo **u**wa mazwi amajeni.

uMupepu uMufinjile akufumwa. <sup>18</sup> Umuntu wowonti we akumubhombela uKilisiti shiniisho, akumukhondezya uMlungu, khabhili akwitishilwa na bhantu.

<sup>19</sup> Pe inga zili shiniisho, tuyikungulaje nhaani kubhomba ziila zye zikuleeta uwutengaanu na zye zikutwavwa kugomanya mu lwitikho. <sup>20</sup> Pe shiniisho, utananganyaaje imbombo ya Mlungu kunongwa iya shaakulya. Iwakulya vwonti vve vikuliwa vitali nu mwinho, ileelo khabhiibhi kwazya unholo mu lwitikho abhombe imbiibhi kunongwa iya shaakulya shoshonti she ukulya. <sup>21</sup> Kwashi uleshe kulya inyama, awe kamwela idivaayi,† na kuyidinda kubhomba khokhonti khe khakumwazya unholo wiinyu mu lwitikho abhombe imbiibhi. <sup>22</sup> Pe shiniisho, khe ukukhiitika ku liniilyo, khabhe kukwakho iwe nu Mlungu. Asayiilwe umuntu we atakuyilonga wuuyo we akubhomba akhantu khe akulola kuti wugulosu. <sup>23</sup> Ileelo umuntu we akubha ni nsingaano mu mwoyo ku zya shaakulya she akulya, inga aalya, alongiilwe kuti akubhomba libhiibhi, kunongwa ye ataliye ku lwitikho. Lyolyonti lye likubhombwa sita lwitikho ku kubhomba imbiibhi.

## 15

*She yikwanziwa kubhabhombela abhanji*

<sup>1</sup> Pe itwe twe tugomile mu lwitikho, tukwanziwa twavwaje uwatolwe uwa bhaala bhe bhatagomile mu lwitikho. Tutabhombaje zye zikutukhondezya taneetwe tubheene. <sup>2</sup> Umuntu weeka weeka pakaasi yiitu, akwanziwa kumukhondezya uwamwabho, kwi dala ilya kumubhombela inyinza inga wunuyo agome mu lwitikho. <sup>3</sup> Kunongwa ye uKilisiti woope

† 14:21 14:21 Idivaayi Bhaazy mu Wilulanyo uwa mazwi amajeni.



atakhayikhondezyaga wuuyo, lyoli akhabhombaga anza she yisimbiilwe mu Wusimbe uWufinjile kuti,  
 “Indigo zye bhakukuliga iwe Mulungu,  
 zyanaajile ine.”\*

<sup>4</sup> Zyonti zye zyasimbiilwe imaandi mu Wusimbe uWufinjile, zyasimbiilwe kuti zitumanyizyaje itwe. Uwusimbe wuwuwo wukuutupa uwujimbiilizu nu wujinjizu, inga tubhe nu lusubhilo.

<sup>5</sup> UMulungu we akuutupa umwoyo uwa kujimbiilila na kujinjila, abhabhishe mubhe nu wupeeka, kwi dala ilya kwenyezya ishikholanyo sha Yeesu Kilisiti. <sup>6</sup> Ipo pe ku mwoyo weeka na kwi zi lyeka, mutikhole kumupaala uMulungu, uTaata wa Mwene wiitu uYeesu Kilisiti.

UMulungu akubhiitika aBhayahuudi na bhe te Bhayahuudi

<sup>7</sup> Pe shiniisho, muposhelanaje muneemwe na muneemwe anzu Kilisiti she abhaposheleeye imwe, inga uMulungu apalwaje. <sup>8</sup> Kunongwa ye inkubhabhuuzya kuti, uKilisiti aamile mubhombi wa Bhayahuudi. Ayinzile inga alolesye uwusunde wa Mulungu, na kuti akwilizye umulaji we abhapiiye abhamaama bhitu abhi maandi. <sup>9</sup> Khabhili ayinzile inga abhantu bhe te Bhayahuudi bhamupaale uMulungu ku shisa shaakwe. Anza she yisimbiilwe mu Wusimbe uWufinjile kuti,  
 “Pe shiniisho, intikupaale pakaasi pa bhe te Bhayahuudi, intikwimbile inyimbo izya kulipaala itaawa lyakho.”†

<sup>10</sup> Khabhili uWusimbe wakuti,  
 “Imwe mubhantu abhi nsi zyonti,  
 seshelaji peeka na bhantu bha Mulungu.”‡

\* 15:3 15:3 Bhaazyza Zabuuli 69:9; Mataayi 27:40-44. † 15:9 15:9 Bhaazyza 2 Samweli 22:50; Zabuuli 18:49. ‡ 15:10 15:10 Bhaazyza Nkumbushizyo 32:43.

<sup>11</sup> Khabhili wukuti,  
 “Imwe mubhantu abhi nsi zyonti, mupaalaje uMwene.  
 Imwe mubhantu bhonti mupaalaje!”§

<sup>12</sup> Woope umukuwi uYeesaya átili,  
 “Umuntu weeka mu shipaafi sha Yeese akhayinza,  
     woope akhayibhatabhaala abhantu abhi nsi zyonti,  
     bhoope           bhakhayimusubhila           kuti  
     akhayibhapokha.”\*

<sup>13</sup> Pe shiniisho, uMulungu we akuutupa ulusubhilo,  
 aabhape uluseshelo lwonti nu wutengaanu kwi dala ilya  
 kumwitikha uweene, inga ulusubhilo lwinyu lwonjele  
 ku makha ga Mupepu uMufinjile.

*Insiibho ya Paulo kusimba ikalaata ili*

<sup>14</sup> Bhanholo bhitu mu lwitikho, ine naneene imany-  
 ile ku wusimishizu kuti mwe bhantu abhinza, mali nu  
 wumanyi wonti, khabhili mangakhola kumanyizanya  
 muneemwe na muneemwe. <sup>15</sup> Ileelo imbasimbiiye  
 ku wudandamazu mwi kalaata ili inongwa zimo, inga  
 imbakumbusye winza inongwa ziniizyo. Imbombile  
 shiniisho kufumilana nu wiila we uMulungu ampiiye,  
<sup>16</sup> inga imbe ne mubhombi wa Yeesu Kilisiti ku bhantu  
 bhe te Bhayahuudi. Inkubhomba imbombo iya wupuutili  
 iya kulumbiilila iNtumi iNyinza izya Mulungu, inga  
 abhantu bhe te Bhayahuudi bhabhe ngati mfinjile ye  
 yikwitishilwa nu Mulungu, ye uMupepu uMufinjile ay-  
 izelufwizye.

<sup>17</sup> Pe shiniisho, kunongwa ye impatinhiine nu  
 Yeesu Kilisiti, inkuyipaala ku mbombo ini ye  
 inkumubhombela uMulungu. <sup>18</sup> Niine te indonje  
 izwi naalimo ilyamwabho, lyoli liila lye uYeesu Kilisiti

§ 15:11 15:11 Bhaazya Zabuuli 117:1.  
 11:10.

\* 15:12 15:12 Bhaazya Yeesaya

ábhombile kushilila kukwani. Ábhabhiishile abhantu bhe te Bhayahuudi bhamutinishe kushilila mu mazwi ge inhalongaga ni mbombo ye inhabhombaga, <sup>19</sup> ku makha aga vilolesyo na mayele ge nábhombile ku makha ga Mupepu uMufinjile. Pe shiniisho, nájendeeye poponti kwandila mu nhaaya iya Yelusaleemu kufishila mu mukoa uwa Iluliko kulumbiilila iNtumi iNyinza ku zya Kilisiti. <sup>20</sup> Insiibho yaani ku kulumbiilila iNtumi iNyinza poponti paala pe intumi zya Kilisiti zitalumbiliilwe, inga intakhazenje pamwanya pa lwalo lwi mbombo ya muntu uwunji. <sup>21</sup> Anza she yisimbiilwe mu Wusimbe uWufinjile kuti,

“Abhantu bhe bhatalumbiliilwe intumi zyakwe,  
bhakhayilola,  
na bhantu bhe bhatimvwizye,  
bhakhayizyaganya.”†

*ishuumilwa* sha Paulo kubhala mu nhaaya iya ku Luumi

<sup>22</sup> Yiniiyo ye nongwa nádindiilwe akhinji buulo kwinda kukwinyu. <sup>23</sup> Ileelo ishi, imalile imbombo yaani kwonti uku kwe indi. Ku manha aminji, insambile kwinda kukwinyu. <sup>24</sup> Inkusubhila kubhayaatila imwe we inkushila kubhala mu nsi iya ku Hisi-paniya. Inkubhalaabha kuti mukhanaavwe kumfisa kunukwo, we niikhala na kuseshela peka nimwe ku khabhalilo khashe.

<sup>25</sup> Ileelo akhabhalilo ikha inkubhala ku Yelusaleemu kubhaavwa abhafinjile. <sup>26</sup> Kunongwa ye ivibhanza ivwa ku Makedoniya ni vwa ku Akaaya vwálolile khinza kusangula ivintu vwabho ivwa kubhaavwa abhafinjile bhe bhapiina ku Yelusaleemu. <sup>27</sup> Bhiibho bhámuuye kubhomba shiniisho ku luseshelo, ileelo

† 15:21 15:21 Bhaazya Yeesaya 52:15.

ku wanalyoli, bhakhondeeye kubhaavwa bhanaabho. Kunongwa ye inga abhantu bhe te Bhayahuudi, bha-posheleeye insayo izya shifinjile peeka na Bhayahuudi, bhoope bhakwanziwa kubhaavwa aBhayahuudi ivintu vwe bhabhuliliilwe. <sup>28</sup> We naamala imbombo yiniyo iya kubhapa bhe bhitishile abha ku Yelusaleemu ivintu viniivo, inhayibhashilila imwe we inkushuula kubhala ku Hisipaniya. <sup>29</sup> Imanyile kuti, we nianza kukwinyu, mukhayiposheela insayo inyinji nhaani kufuma kwa Kilisiti.

<sup>30</sup> Bhanholo bhitu mu lwitikho, inkubhalamba ku waamulo wa Mwene wiitu uYeesu Kilisiti, na ku lugano lwe lukufuma kwa Mupepu uMufinjile, mubhe peeka niine kwi dala ilya kumpuutila ine kwa Mulungu. <sup>31</sup> Mumputilaje inga abhantu bhaala bhe bhatamwitishile uYeesu Kilisiti mu nsi iya Yudeeya, bhatakambombele uwubhiibhi naawumo.† Khabhili mupuutaje inga abhafinjile abha ku Yelusaleemu bhakhaposheele akhinza ivintu vwe inkubhatwalila. <sup>32</sup> Pe shiniisho, inga umulungu ayigana, inhayinza kukwinyu ku useshelo, inhatuuzye peeka niimwe. <sup>33</sup> Umulungu we akubhapa uwutengaanu, abhe peeka niimwe mwenti. Zibhe shiniisho!

## 16

*UPaulo* akubhalamukha abhantu niibho niibho

<sup>1</sup> Inkuseshela kumumanyisa kukwinyu uFiibi uyilumbu wiitu mu lwitikho, umubhombi uwa shibhanza she shili mu nhaaya iya mu Kenkileya. <sup>2</sup> Inkulaabha mumuposheele akhinza, kunongwa ye amwitishile uMwene uYeesu. Shiniisho she abhafinjile bhakwanziwa kubhomba. Khabhili inkulaabha kuti

† 15:31 15:31 Bhaazya Mbombo zya Bhasundikwa 21:27-36.

mumwavwe vwe abhuliliilwe, kunongwa ye uweene abhavwizye abhantu abhinji, niine bhualo anavwizye.

<sup>3</sup> Mundamushile uPulisika peeka nu mulume waakwe uAkiila. Bhanaabho bhabhombi bhamwitu mu mbombo ya Yeesu Kilisiti. <sup>4</sup> Bhayinganyinye kufwa kunongwa iya kutuula uwuuni waani. Inkubhasalifwa, te neene numwene ne inkubhasalifwa, lyoli ni vibhanza vwonti ivwa bhantu bhe te Bhayahuudi vikubhasalifwa. <sup>5</sup> Khabhili mundamushile ishibanza she shikubhangaana mu nyumba yaabho. Mundamushile nu maganwa waani uEpayineeto, we amile wa kwanda kumwitikha uKilisiti mu mukoa uwa Asiya.

<sup>6</sup> Mundamushile uMaliya, we abhombile imbombo ku mwoyo wonti kunongwa yiinyu. <sup>7</sup> Khabhili mundamushile uAndoloniko nu Yuniya, aBhayahuudi abhamwitu, bhe bhakungiilwe mwi jeela peeka niine. Abheene bhamanyishile nhaani ku bhasundikwa, khabhili bhantanguiliye kumwitikha uKilisiti.

<sup>8</sup> Mundamushile uAmpuliato, umanyani waani mu wapeeka nu Mwene. <sup>9</sup> Mundamushile uLibano umubhombi uwamwitu mu mbombo ya Kilisiti. Mundamushile nu manyani waani uSitaakisi.

<sup>10</sup> Mundamushile uApeele, we amile musunde mu ndingo kunongwa ya Kilisiti. Khabhili mundamushile abhantu bhonti bhe bhakwikhala mu nyumba ya Alisitobulo.

<sup>11</sup> Mundamushile uHelodioni, uMuyahuudi uwamwitu, na bhantu bhe bhakwikhala mu nyumba ya Nalikiiso, bhe bhamwitishile uMwene uYeesu.

<sup>12</sup> Mundamushile uTilifeene nu Tilifoosa abhantanda bhe bhakubhomba imbombo ya Mwene uYeesu ku mwoyo wonti. Khabhili mundamushile umaganwa

waani uPelisiisi. Wunuuu woopé ábhombile imbombo iya Mwene uYeesu ku mwoyo wonti.

<sup>13</sup> Mundamushile uLuufu, umusaabhuwa wa Mwene uYeesu, nu nyina waakwe. Umaayi wunuuyo ánavwizye ngati wu nyina waani we ampaapile.

<sup>14</sup> Mundamushile uAsinkilito, uFulegoni, uHelime, uPatiloba, uHelima, na bhanholo bhitu mu lwitikho bhonti bhe bhali peeka nabho.

<sup>15</sup> Mundamushile uFilologo nu Yuliya, uNeleya na bhayilumbu bhaakwe, nu Olimpa, peeka na bhafinjile bhonti bhe bhali peeka nabho. <sup>16</sup> Mulamunhanaje ku lugano ulwa nalyoli. Iyibhanza vwonti iwwa Kilisiti vwe vili uku vikubhalamukha.

### *Indajilo zya Paulo*

<sup>17</sup> Ishi, bhanholo bhaani mu lwitikho, inkubhasokha kuti mubhe amiiso na bhantu bhaala bhe imanyizyo zyahho zikubhagabhulanya bhe bhitishile, na kubhapuvwa mu lwitikho. Mwikhalaje ukutali nabho, kunongwa ye imanyizyo zyahho zikulegana na ziila zye mwámanyiye. <sup>18</sup> Kunongwa ye abhantu anza bhanaabho bhatakumubhombela wu Mwene wiitu uYeesu Kilisiti, lyoli bhakubhomba kwikusya inyanda zyahho bhiihho. Khabhili ku mazwi gaabho aminza aga kulambiilizya, bhakukhopela amooyo aga bhantu bhe bhatolwe mu lwitikho. <sup>19</sup> Abhantu bhonti bhamanyile she mukumutinikha uMwene uMulungu. Liniilyo likumpa uluseshelo nhaani kunongwa yiinyu. Ileelo inkwanza mubhe ni njeele iya kuzimanya inyinza, na kubha ukutali ni mbiibhi. <sup>20</sup> Umulungu we akuleeta uwutengaanu atimutinze nalubhilo uSeetani na kubhapa amakha aga kumutola. Uwiila wa Mwene wiitu uYeesu Kilisiti wubhe peeka niimwe.

<sup>21</sup> UTiimoti, umubhombi uwanwitu, akubhalamukha. Khabhili uLukiyo, uYaasoni nu Sosipatulo aBhayahuudi abhamwitu, bhoope bhakubhalamukha. <sup>22</sup> Ine ne Telatiyo, ne insimbile ikalaata ili ilya Paulo, inkubhalamukha kwi taawa lya Mwene uYeesu. <sup>23</sup> Akubhalamukha uGaayo, we amposheleeye ine mu nyumba yaakwe, mwe ishibhanza shonti shikubhangaana. Uelaasito, we akusengula inhela izyi nhaaya ini,\* nu Kwalito, unholo wiitu mu lwitikho woope akubhalamukha. [ <sup>24</sup> Uwiila wa Mwene wiitu uYeesu Kilisiti wubhe peeka niimwe mwenti. Zibhe shiniisho.]†

**UPaulo akumupaala uMulungu**

<sup>25</sup> Ishi, tumupaalaje uMulungu! Uweene ali na makha aga kubhagomwa mu lwitikho kushilila mu Ntumi iNy-inza zye inhambulilaga kukwinyu ku zya Yeesu Kilisiti. Intumi ziniizyo imaandi zyafisiilwe. <sup>26</sup> Heelo ishi intumi ziniizyo zibhishiilwe apazelu, na kumanyikha kushilila mu wusimbe uwa bhakuwi ku ndajizyo ya Mulungu uwa wiila na wiila, inga abhantu abhi nsi zyonti bhamwitishe uMwene uYeesu na kumutinikha.

<sup>27</sup> UMulungu we ali mwene, we ali ni njeele zyonti. Apalwaje wiila na wiila kwi dala ilya Yeesu Kilisiti! Zibhe shiniisho.

---

\* <sup>16:23</sup> <sup>16:23</sup> Inhaaya ini Inhaaya yiniyo pamu ye nhaaya iya mu Kolinso. † <sup>16:24</sup> <sup>16:24</sup> Umusitaali uwu wutaliipo mu wusimbe wumo uwi maandi uwa Shiyunaani.

ULufingo uLupwa ku ndongo iya Shimalila  
Malila: ULufingo uLupwa ku ndongo iya Shimalila (New  
Testament+)

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 13 Jun 2022

3aa8e7a3-f258-5182-ab3f-fbc6f725bb06